

TUTÚ DÍHNA NUU NĪ CADÚHA TÉ PĀBLÚ QUIHIⁿ NDAHA ÑÁYIU ÑUÚ CÒRINTÚ

*Té Pāblú cáduha-dé tutú quihiⁿ ndaha ñáyi
xĩndecu ichi Xítoho Jesucristú ndécú ñúú Còrintú*

¹ Yúhú té Pāblú ní cáháⁿ ñáhá Yă Ndiõxí xii-í cuendá sá cáháⁿ-í tnúhu Xítoho Jesucristú núú ñáyi, chi ducaⁿ nĩ cachí Yă Ndiõxí cunduu. Te càdúha-í tutú-a ndihi té Sõstenēs tée ndècu ndihi-o ichi Xítoho Jesucristú ² cuendá daquixi-í ndaha nchòhó ñáyi xĩndecu ichi Yă Ndiõxí ndécú ñúú Còrintú, chi nchòhó cúu-ndó ñáyi cùu cuendá Yă Ndiõxí cuendá sá ndécú ndihi-ndo Xítoho Jesucristú. Te diu-ni-ndo cùu-ndo ñáyi ní cáháⁿ ñáhá Yă Ndiõxí cuendá cundecu yiñùhu-ndo núú-gă, ndihi nchaa dava-gă ñáyi ndècu nchaa xichi, ñáyi cāchí sá ío cāhnu cuu Xítoho Jesucristú. Te Yaá-áⁿ cúu-gă Xítoho-yu, te diu-ni-gă cúu-gă Xítoho nchoo tucu. ³ Te xicáⁿ táhù-í núú Tātá-ó Dútú Ndiõxí ndihi núú Xítoho Jesucristú sá ndi nduú-gă ío na chĩndee chitúu ñaha-gă xii-ndo, te ío váha cuu iní-ndó cùndecu-ndo.

Yă Ndiõxí ío chĩndee ñaha-gă xii-o cuendá sá ndécú-ó ndihi Xítoho Jesucristú

⁴ Te ducaⁿ-ni ío ndācáⁿ táhù-í núú Yă Ndiõxí cuendá-ndó, chi mee-gă ío chĩndee chitúu ñaha-gă xii-ndo sá cuendá Xítoho Jesucristú. ⁵ Te cuendá sá ndécú-ndó ndihi Xítoho Jesucristú, núu xiáⁿ Yă

Ndiöxí ío chindee ñaha-gá xii-ndo sàá díquí-ndó nàcuáa cáháⁿ-ndó, ndìhì nàcuáa cùnuní iní-ndó, ⁶ chi tnúhu sá ni ñhí-ndó cuendá Xítohó Jesucristú ní quée-xi iní-ndó. ⁷ Te xíáⁿ nùu nchaa sá vãha ñá túú tnàhí cùmání xii-ndo chi Yá Ndiöxí ío chindee ñaha-gá. Te ducaⁿ quide-gá ñini nchòhó ni yùhu ni iní-ndó ndètu-ndo sáá nduu quèxi tucu Xítohó Jesucristú. ⁸ Te Yá Ndiöxí ducaⁿ-ni ïo chindee ñaha-gá xii-ndo cuendá sá vã yõ teñaha cuèchi nduu na quèxi tucu Xítohó Jesucristú. ⁹ Te nchaa sá cáháⁿ Yá Ndiöxí dacuití quide-gá, te ñu-gá cúú-gã Yaá ní cáháⁿ ñháá xii-ndo cuendá cuu ñnuu-ndo ndìhì Déhe-gá Xítohó Jesucristú Yaá cúú Xítohó-ó.

Ñá túú cùu ñnuu ñáyiu ndècu ichi Xítohó Jesucristú

¹⁰ Te nchòhó ñáyiu ndècu ndìhì-í ichi Xítohó Jesucristú cáháⁿ-í dóho-ndo sã vã ndì díⁿ càni iní-ndó, te ío cuu ñnuu-ndo cùndecu-ndo, te ñⁿ-ni càni iní-ndó, te ñⁿ-ni càda-ndo chi ducaⁿ cuiní-gá cunduu. ¹¹ Te duha cáháⁿ-í dóho nchòhó ñáyiu ndècu ndìhì-í ichi Xítohó Jesucristú, chi cue ñáyiu vehe té Clòé ní cachí tnúhu-yu xii-í sá ñà túú cùu ñnuu-ndo ndecu-ndo. ¹² Te duha ndùu tnúhu ní ñhì-í nàcuáa cùu ndecu-ndo, chi dava-ndo cächí-ndó: “Yúhú cùu-í cuendá té Páblú.” Te dava-ndo cächí-ndó: “Yúhú cùu-í cuendá té Àpolós.” Te dava-ndo cächí-ndó: “Yúhú cùu-í cuendá té Pèlú.” Te dava tucu-ndo cächí-ndó: “Yúhú cùu-í cuendá Xítohó Jesucristú”, duha cächí-ndó. ¹³ Te vá dúcáⁿ cáháⁿ-ndó chi ñá túú nã daha Xítohó Jesucristú ndécú chi ñⁿdì-ni-gá. Te ñá díú yùhú té Páblú ní xhí-í núú cùrúxí sá cuendá-ndó, te ni ñà túú ní sàndute-ndo cuendá sá

yǎhú cuu cuendá ñáhà-í xii-ndo. ¹⁴ Te táxǎhu xii Yá Ndiǒxí chi ñá díú nchàa-ndo ni dacuandute-í, chi té Crispú-ni ndìhi té Gáyú-ni ní dácúándute-í-güedé. ¹⁵ Te xíáⁿ nǔu vá cúú tnàhí càháⁿ-ndó sǎ ñí sandute-ndo sǎ cúú cuendá ñáhà-í xii-ndo. ¹⁶ Te ní ndacu tucu iní-í sǎ tnàhá tucu ñáyiu cùu ndi mee té Èstéfanás ní dácúándute-í, te diu-ná ñáyiu-án te sànuu sǎ ñà túú-gǎ nágá ñáyiu ni dàcuandute-í. ¹⁷ Te Xítohó Jesucristú ñá túú ní tëndaha ñaha-gá xii-í sǎ dácúándute-í ñáyiu, chi ní tendaha ñaha-gá xii-í sǎ càháⁿ-í tnúhu-gá núǎ-yu, tnúhu sǎ càháⁿ nàcuáa naníhí tàhú-ó. Te ñá túú càháⁿ-í dàtná càháⁿ ñáyiu túha. Te ducaⁿ quide-í cuendá sǎ nchòhó quíndáá váha iní-ndó tnúhu sǎ càháⁿ nàcuáa ní xíhí Xítohó Jesucristú núú cùrúxí. Chi núu na càháⁿ-í dàtná càháⁿ ñáyiu túha te nchòhó vá quíndáá iní-ndó tnúhu-án nàcuáa tàú-xi cunduu.

Sá cuendá Xítohó Jesucristú cùnùní iní-ó sǎ ïo cǎhnu cuu Yá Ndiǒxí

¹⁸ Te nchaa ñáyiu ta xíta nihnu cuáháⁿ càchí-yu sǎ ñà túú nàndìhi tnúhu sǎ càháⁿ nàcuáa ní xíhí Xítohó Jesucristú núú cùrúxí, dico sǎ cúú-xi nchòo ñáyiu sa ní naníhí tàhú, chi tnúhu-án cúú-xí ìⁿ tnúhu sǎ ñí taxi Yá Ndiǒxí ndécú ndìhi-o cuendá ndacu-gá cada-gá nchaa nàcuáa cuiní-gá iní-ó, ¹⁹ te quèe ndáá-xi nàcuáa càháⁿ-gá núú tütú-gá núú càchí-xi: Yúhú cada-í te nchaa ñáyiu túha vá nándìhi-gá nchaa sǎ xíní tnùní-yu, te nchaa ñáyiu ío váha sàá díquí-xi vá nándìhi-gá nchaa nàcuáa sàni iní-yu. Duha càchí Yǎ Ndiǒxí núú tütú-gá.

20 Te xíãⁿ cútnùnì iní-ó sã ncháá ñáyiu sàni iní-xi sá ïo túha ndècu ñuyíú-a, ndihì nchaa cue téé dàcuaha ñaha xii-yu nchaa tnúhu ní chídó tnùnì ndíi Moisés, ndihì nchaa ñáyiu ío váha sàá díquí-xi càháⁿ cuendá nchaa sá ïo ñuyíú-a, te nchaa ñáyiu-áⁿ càchí Yã Ndiõxí sá ñà túú nàndíhì nchaa sá xìnì tnùnì-yu sá cúú-xí-gã. 21 Te Yá Ndiõxí ío váha cùtnùnì iní-gá nàcuáa quide-gá, chi ñá túú dàña-gá cundecu ndihì ñahá-yu xii-gá sá cuendá nchaa sá ñi sáá díquí méè-yu, te ducaⁿ quide-gá chi cuiní-gá sá cùndedóho-yu tnúhu sá sání iní-yu ñá túú nàndíhì. Te sá cuendá tnúhu-áⁿ te naníhí tàhú-yu te núu na quindáá iní ñáhã-yu xii-gá.

22 Te cue ñáyiu isràél cuiní-yu quiní-yu sá vã yõo tnàhí ndàcu cada, te cue ñáyiu griègú nchicúⁿ nihnú-yu nchaa sá dácuaha ñáyiu ío túha. 23 Dico nchoo yìhì-o càháⁿ-ó núú ñáyiu sá Xítohó Jesucrístú ní xihí-gá núú cùrúxí. Te cue ñáyiu isràél ñá túú tnàhí tnàhá iní-yu cundedóho-yu tnúhu-áⁿ. Te cue ñáyiu ñá túú cùu ñáyiu isràél càchí-yu sá ñà túú vèdana nàndíhì tnúhu-áⁿ. 24 Dico sá cúú-xí nchaa ñáyiu ní càháⁿ ñáhã Yã Ndiõxí chi cuèi cùú-yu ñáyiu isràél àdi ñá túú cùú-yu, dico ñáyiu-áⁿ càchí-yu sá sã cuendá Xítohó Jesucrístú cútnùnì iní-yu sá ïo càhnu cuu Yá Ndiõxí te ndècu ndihì-gá nchaa sá xìnì tnùnì-gá. 25 Te sá quidé Yã Ndiõxí càchí ñáyiu ñuyíú-a sá ñà túú nàndíhì, dico xíãⁿ ío-gá nàndíhì dàcúúxí sã sání iní méè-yu. Te sá ñi xihí Xítohó Jesucrístú núú cùrúxí, xíãⁿ càchí ñáyiu sá ñà túú ní nihí ndéé Yã Ndiõxí cada-gá sá ñi sani iní-gá cada-gá. Dico sá dúcáⁿ ñi quide Yá Ndiõxí, xíãⁿ

cúu-xí sǎ ɔ-gá ní níhí ndéé-gǎ ní quide-gá ɛ̃ⁿ sá nǎ sani iní-gá dàcúúxí sǎ sání iní mée ñǎyiu ñuyúú-a. ²⁶ Te nchòhó ñáyiu ndècu ndihí-í ichi Xítóhó Jesucristú, chí dándàcu iní nàcuáa ndècu-ndo cútnàhá ní càháⁿ ñáhá Yǎ Ndiǒxí xii-ndo, chí sacú-ni-ndo túha dàcúúxí ñáyiu ñá túú ndècu ichi-gá. Te ducaⁿ sàcú-ni-ndo tàxi tnuní-ndó, te diu-ni ducaⁿ sàcú-ndó nèhe ñáyiu sá yíñùhu núú-ndó. ²⁷ Te ñáyiu ñá túú ndècu ichi Yá Ndiǒxí càchí-yu sá ñà túú tnàhí túha dava-gá tnàha ñáyíú-yu, dico dava ñáyiu ñá túú túha-án càháⁿ ñáhá Yǎ Ndiǒxí xii-yu cundecú-yu ichi-gá, te cundecu ndihí ñaha-gǎ xií-yu, te ducaⁿ dándóo canúú-yu nchaa ñáyiu càchí sá ɔ túha. Te càháⁿ tucu-gá ñáyiu càchí dava-gá ñáyiu sá ñà túú tnàhí tàú cunuu cundecú-yu ichi-gá, te ducaⁿ cundecu ndihí ñaha-gá xií-yu, te dándóo canúú-yu nchaa ñáyiu càchí sá táxí tnùní. ²⁸ Te ducaⁿ Yǎ Ndiǒxí càháⁿ-gá ñáyiu ñá túú tnàhí cunuu cundecu ndihí-gá, ndihí ñáyiu quèe tíhú núú dàva-gá tnàha ñáyiu-xi, ndihí ñáyiu càchí-yu sá ñà túú vèdana nàndíhi, nchaa ñáyiu-án càháⁿ-gá cundecu ndihí-gá, te ducaⁿ quide-gá cuèndá dándóo canúú-yu nchaa ñáyiu càchí sá ɔ cunuu. ²⁹ Te núu xíǎⁿ ni ɛ̃ⁿ ñáyiu vá cúú càchí-yu sá ɔ càhnu cuú-yu núú Yǎ Ndiǒxí. ³⁰ Dico nchòhó chí mee Yǎ Ndiǒxí ní quide-gá ndécú-ndó ndihí Xítóhó Jesucristú, te Xítóhó Jesucristú ní quide-gá ní cutnùní iní-ó sǎ Yǎ Ndiǒxí cúú-gǎ Yaá ndécú ndihí nchaa sá xìní tnùní-gá. Te diu-ni Xítóhó Jesucristú ní quide-gá cuèndá sá nchóó vǎ cundècu-gá cuéchi-o núú Yǎ Ndiǒxí, te ducaⁿ cundecu yíñuhu-o núú-gǎ, te nduu táhú-ó cundecu-o ndihí-gá ni caa ni quíhíⁿ. ³¹ Te

sá dúcáⁿ quide-gá nõu xĩaⁿ xíní ñũhu-xi cada-o nacuáa cãháⁿ-xi núú tütú Yã Ndiõxí núú cãchí-xi: “Vã cãchí-ndó sã méé-ndó ïo cãhnu cuu-ndo, chi cachí-ndó sã Yãá cúú Xítohó-ndó ïo cãhnu cuu-gá”, duha cãchí-xi núú tütú-gá.

2

*Tnúhu sá cãháⁿ nãcuáa ní cuu ní xíhí Xítohó Jesu-
crístú núú cùrúxí*

¹ Te nchòhó ñãyiu ndècu ndìhí-í ichi Xítohó Jesu-
crístú sa nãha-ndo sá cùtnàhá ní quixi-í ní cãháⁿ-í
tnúhu Yã Ndiõxí núú-ndó, te ñã túú ní cãháⁿ-í dàtná
cãháⁿ ìⁿ ñãyiu ïo váha sàá díquí-xi, àdi datná cãháⁿ
ìⁿ ñãyiu ïo túha. ² Chi cùtnàhá ní xíndecu ndìhí
ñaha-ĩ xii-ndo chi ní sani iní-í sá méé-ní cuendá
Xítohó Jesucrístú cãháⁿ-í núú-ndó ndìhí nacuáa
ní cuu ní xíhí-gá, te ñã ducaⁿ ñĩ quide-í. ³ Te
cùtnàhá ní quexio-í núú ndécú-ndó te ñã cùtnùní
iní-í nása cada-í ní cùu, te ïo ní quiyùhú iní-í ní
cãháⁿ-í tnúhu-gá núú-ndó. ⁴ Te cùtnàhá ní cãháⁿ-í
nãcuáa ndùu tnúhu Xítohó Jesucrístú núú-ndó, te
nãha-ndo sá Espíritú Yã Ndiõxí ní chindee ñãha-xi
xii-í ní cãháⁿ-í tnúhu-gá núú-ndó, te tnúhu-áⁿ ñĩ
quée-xi iní-ndó. Te ñã túú ní cãháⁿ-í ìⁿ tnúhu
cãhnu núú-ndó tnũhu sá cãháⁿ cue ñãyiu ïo váha
sàá díquí-xi. ⁵ Te ducaⁿ ñĩ cuu cuendá sá nchòhó
quíndáá iní-ndó tnũhu Yã Ndiõxí chi ní quide-gá sá
vãha sá cúú-xí iní-ndó, te ñã díú sã cuendá tnúhu sá
cãháⁿ ñãyiu cãchí sã ïo túha ducaⁿ ñĩ sãndáá iní-ndó
tnũhu-gá.

*Espíritú Yã Ndiõxí quidé-xí cùtnuní iní-ó nãcuáa
sãni iní-gá*

⁶ Te nchoo càháⁿ-ó tnũhu càhnu núú ñãyiú sa ní níhí ndéé ndècu ichi Xítohó Jesucrístú. Te tnúhu-áⁿ ñà túú càháⁿ ñãyiú ñã túú ndècu ichi-gá, te ni cuè téé yìndaha ñaha xií-yu ñã túú càháⁿ-güedé tnúhu-áⁿ chi cue téé-áⁿ naa-güedé. ⁷ Te tnúhu càhnu-áⁿ cúú-xí tnũhu Yá Ndiõxí, te mee-gã ní cachí-gá ndéé cútnàhá vátá ngáva-gá ñuyíú sã ncháá ñãyiú na quìndáá iní tnúhu-áⁿ te nduu táhũ-yu cundecú-yu ndihí-gá núú ïo váha càa ndecu-gá ni caa ni quíhíⁿ. Te tnúhu-áⁿ ndúú yùhu-xi ni cuu. ⁸ Te ni ñⁿ cue téé yìndaha cue ñãyiú ñuyíú-a ñã túú tècú tnùní-güedé tnúhu-áⁿ, chi núú dìcò tècú tnùní-güedé tnúhu-áⁿ te vá cátá càa-güedé Xítohó Jesucrístú núú cùrúxí cahni ñaha-güedé xii-gá ní cùu. Te ñi-ni Yaá-áⁿ ïo càhnu cuu-gá. ⁹ Dico ducaⁿ ñi cuu chi ní quee ndáá-xi nàcuáa càháⁿ-xi núú tütú Yá Ndiõxí núú càchí-xi:

Yá Ndiõxí sa ní sani iní-gá nchaa nàcuáa cada-gá sá cúú-xí cuèndá nchaa ñãyiú cùu iní ñáhá xì-gá.

Te sá ñi sani iní-gá cada-gá cúú-xí sã vátá quìní-gá ñãyiú te ni vátá cùndèdóho-gá-yu,

te ni ñà túú tnàhí cùtnuní iní-yu nása cada-gá.

Duha càchí-xi núú tütú-gá. ¹⁰ Te mee Yá Ndiõxí ní cachí-gá sá Espíritú-gá cada-xi te nchoo cùtnuní iní-ó ncháa nàcuáa sàni iní-gá cada-gá, ñuu xiáⁿ ducaⁿ tècú tnùní-ó vitna, chi Espíritú-gá xìní-xi nchaandi túhú nàcuáa sàni iní-gá cada-gá.

¹¹ Te ñã ñⁿ ñãyiú xìní ndáá-yu nàcuáa sàni iní ingá ñãyiú, chi mee ñãyiú-áⁿ xìní ndáá-yu nchaa nàcuáa sàni iní-yu. Te ducaⁿ sãtnahá-xi cùu Yá Ndiõxí chi medì-ni Espíritú-gá xìní-xi nchaa nàcuáa sàni

iní-gá. ¹² Te nchoo chi Yá Ndiöxí ní taxi-gá Espíritú-gá ndécú ndìhi-o, te ñá díú ñùyíú-a ducaⁿ ni quèe espíritú ní ngúndecu ndìhi-o. Te ducaⁿ ñí taxi-gá Espíritú-gá ndécú ndìhi-o cuendá ducaⁿ cùtnuní iní-ó nàcuáa ndùu nchaa sá vãha sá dicó ducaⁿ ñí taxi-gá ndécú ndìhi-o. ¹³ Te cuendá nchaa sá vãha-áⁿ càháⁿ-ndí, te càháⁿ-ndí nàcuáa dàcahu iní ñáhá Espíritú Yă Ndiöxí xii-ndí, te ñá túú càháⁿ-ndí nàcuáa càhu iní ñáyiu ñuyíú-a càháⁿ-yu, te ñu-ni nchaa tnúhu dàcahu iní ñáhá Espíritú-gá xii-ndí càháⁿ-ndí, ñu-ni nchaa xíăⁿ dánèhé-ndí nchaa ñáyiu ndècu ndìhi tucu Espíritú-gá.

¹⁴ Te ñáyiu ñá túú ndècu ndìhi Espíritú Yă Ndiöxí ñá túú tnàhá iní-yu nàcuáa ndùu tnúhu dàtecú tnúhu ñaha Espíritú-gá xii-yu, te ni ñà túú tècú tnùnì-yu, te càchì-yu sá ñà túú nàndìhi-xi. Te ducaⁿ chi mee-ni nchàa ñáyiu ndècu ndìhi Espíritú-gá tècú tnùnì-yu nàcuáa ndùu tnúhu-áⁿ. ¹⁵ Te cue ñáyiu ducaⁿ ndècu ndìhi Espíritú Yă Ndiöxí cùtnuní ndáá iní-yu ná cúú nchàa sá vãha, te vá yõo ñⁿ xìnì nchaa nàcuáa sàni iní-yu. ¹⁶ Te núú tütú Yă Ndiöxí càchì-xi: “Vá yõo ñⁿ xìnì nàcuáa sàni iní Yă Ndiöxí, núú xíăⁿ vá yõo ñⁿ ndacu ná danèhé ñáhá xì-gá”, duha càchì-xi núú tütú-gá. Te nchoo chi ñⁿ-ni sàni iní-ó ndìhi Xítóhó Jesucrìstú.

3

Cue tée xĩquide chiùn Yá Ndiöxí

¹ Te nchòhó ñáyiu ndècu ndìhi-í ichi Xítóhó Jesucrìstú càchì tnúhu-í xii-ndo sã ñă ní ñhì-í nàcuáa cada-í cáháⁿ-í tnúhu-gá núú-ndó dàtná càháⁿ-í núú

nchàa ñáyiú quide nchaa nacuaáa càháⁿ Espíritú Yă Ndiöxí, chi ní cáháⁿ-í núú-ndó dàtná càháⁿ-í núú nchàa ñáyiú cùnūu nchaa sá cuèhé sá dúhá ìní-xi, te ní quide ñaha-ĩ xii-ndo dàtná cue ñáyiú íchí ní sándáá iní tnúhu Xítóhó Jesucristú, núu xǎⁿ ducaⁿ ñí cáháⁿ-í núú-ndó. ² Te ní quide ñaha-ĩ xii-ndo dàtná ñⁿ déhe yiquiⁿ vitna sadi camá, te ñá túú ní quide ñaha-í xii-ndo dàtná cue landú sa xèxi dítá, chi ní dánèhé ñáhà-í xii-ndo ñⁿ sá ñà túú tnàhí úhú tecú tnùnì-ndó, te ñá túú ní dànèhé ñáhà-í xii-ndo ñⁿ sá xítò-í sá vǎ tècú tnùnì-ndó. Te quide cuendá-í sá díú-ní dùcaⁿ vǎ tècú tnùnì-ndó ndèé vitna te núu na dànèhé ñáhà-í xii-ndo nchàa dava-gá tnúhu. ³ Te ducaⁿ chi quide-ni-ndo nacuaáa sàni iní méé-ndó, chi ndècu-ni-ndo ichi cuédú íní, te nàá ndihi tnàha-ni-ndo, te ñá túú tnàhí cùu ñⁿnuu-ndo ndecu-ndo. Te xǎⁿ cùtnùnì sá méé-ní nchàa nacuaáa sàni iní méé-ndó quide-ndo, te xǎⁿquide-ndo dàtná quidé nchàa ñáyiú ñá túú ndècu ichi Xítóhó Jesucristú. ⁴ Te dava-ndo càchí-ndó: “Yúhú cùu-í cuendá té Pǎblú.” Te dava-ndo càchí-ndó: “Yúhú cùu-í cuendá té Àpolós”, duha càchí-ndó. Te sá dúcáⁿ càháⁿ-ndó xǎⁿ cùtnùnì sá quidé-ní-ndó mèe-ni nchaa nacuaáa sàni iní méé-ndó.

⁵ Te yúhú té Pǎblú càchí tnúhu-í xii-ndo sǎ ñà túú cùnūu-í, te ni té Àpolós ñá túú cùnūu-dé chi dícó cue téé xínu cuechi núú Yă Ndiöxí cúú-ndǎ, te ní cáháⁿ-ndí tnúhu-gá núú-ndó, núu xǎⁿ ní sándáá iní-ndó. Te ndǎ dííⁿ ndǎ dííⁿ ndùu chiuⁿ ní táhú Yă Ndiöxí cada-ndí. ⁶ Te yúhú cùu-í dàtná ñⁿ téé chìhi tatá chi dàcaháⁿ ñáhà-í xii-ndo tùha-ndo ichi Yá Ndiöxí. Te té Àpolós cúú-dě dàtná ñⁿ téé nàcuhñu chi téé-áⁿ ndécú-dě dánèhé ñáhà-dě

xii-ndo tnũhu-gá. Te Yá Ndiõxí cúú-gã Yaá quidé sàhnu tatá ní chihi-í-án, te duha càháⁿ-í chi ñu-gá quidé-gã tá nihí ndéé-ndó ndècu-ndo ichi-gá. ⁷ Te núu xiãⁿ ni téé chihi tatá te ní téé nàcuhñu ñá túú cùnuu-güedé, dico Yá Ndiõxí io cùnuu-gá chi ñu-gá quidé-gã xĩnu tatá-án te sàhnu-xi. ⁸ Te ñⁿ-ni cùu téé chihi tatá ndihi téé nàcuhñu. Te ducaⁿ sãtnahá-xi cùu nchúhú cue téé xiquide chiunⁿ Yá Ndiõxí, te nàcuáa ndùu chiuⁿ ní quide-ndí te ducaⁿ cùnduu táhú taxi Yá Ndiõxí nduu táhú-ndí. ⁹ Te nchòhó cúú-ndó dàtná ñⁿ xichi núú ní quée tatá, te nchúhú cúú ñⁿnuu-ndí quidé chiunⁿ-ndí xián. Te ducaⁿ sãtnahá-xi cùu-ndo chi cùu cuendá ñáhá Yá Ndiõxí xii-ndo, te nchúhú cúú ñⁿnuu-ndí quidé-ndí chiunⁿ-gá.

Te cùu tucu-ndo datná ñⁿ vehe sá vítná sáá, te ducaⁿ sãtnahá-xi cùu-ndo chi Yá Ndiõxí quidé-gã tá sàhnu nihnu-ndo ichi-gá cuáháⁿ. ¹⁰ Te yúhú cúú-í dàtná ñⁿ téé cùnuu ñacaa vehe te ní tava-í cimièntú-xi, te ñⁿ cue téé véxi dàcaa-güedé ndóho, te ñⁿ ñⁿ cue téé-ánⁿ ño xini ñuhu-xi cada cuendá-güedé nàcuáa dacaa-güedé. Núu ducaⁿ sãtnahá-xi cùu yúhú chi Yá Ndiõxí ní taxi-gá chiunⁿ quide-í te chindee ñaha-gá, chi díhna-gá-í ní quixi-í ní cáháⁿ-í tnúhu Xítohó Jesucristú núú-ndó, te ñⁿ cue téé véxi dàcuaha ñaha-ná xii-ndo tnũhu-gá, te ñⁿ ñⁿ cue téé-ánⁿ ño xini ñuhu-xi cada cuendá-güedé nàcuáa dacuaha ñaha-güedé xii-ndo tnũhu-gá. ¹¹ Te cimièntú vehe-ánⁿ cada iní-ó sã cúú-xí mèe Xítohó Jesucristú, te ducaⁿ chi yúhú ní dánèhé ñáhà-í xii-ndo ní ngúndecu ndihi-ndo Xítohó Jesucristú, te vá yõo-gá cundecu ndihi-ndo chi ñⁿdií díí-ni-gã ndécú. ¹² Te dava cue téé dàcaa-güedé vehe váha te chihí-güedé

díhúⁿ cuááⁿ, ndihí díhúⁿ cuixíⁿ, ndihí yúú sã ïo vii càa. Te dava-güedé dácàa-güedé vehe vítú, te dava-güedé dácàa-güedé vehe ité, te dava-güedé dácàa-güedé vehe tnuvixiⁿ. ¹³ Te sáá nduu te nchaa vehe-áⁿ cãyú-xi, te vehe vítú-ãⁿ ndihí vehe ité-áⁿ ndihí vehe tnuvixiⁿ-áⁿ ndoo ndoo cãyú, te nchaa vehe váha-áⁿ vã cãyú-xi cuëi na yãha ñuhú. Te nchaa cue téé ní dácáá vèhe váha-áⁿ cada iní-ó sã cúú-güedé ñáyiu ío váha quide chiuⁿ Yá Ndiöxí. Te nchaa cue téé ní dácáá vèhe vítú, ndihí cue téé ní dácáá vèhe ité, ndihí cue téé ní dácáá vèhe tnuvixiⁿ cada iní-ó sã cúú-güedé ñáyiu ñá túú cuiní cada chiúⁿ Yá Ndiöxí nàcuáa tàú-xi cunduu. Te sáá nduu te cutnùní nàcuáa ndùu chiuⁿ ní quide ìⁿ ìⁿ ñáyiu, chi Yá Ndiöxí cáháⁿ-gá nàcuáa ndùu chiuⁿ ní quide ìⁿ ìⁿ ñáyiu ní quide chiúⁿ-gá. ¹⁴ Te cue ñáyiu ío váha xiquide chiúⁿ Yá Ndiöxí te cùdíi chiúⁿ quidé-yu, te ñáyiu-áⁿ ñihí-yu sá ndúú tãhũ-yu. ¹⁵ Te cue ñáyiu ñá túú quide chiuⁿ Yá Ndiöxí nàcuáa tàú-xi cunduu, te vá cùdíi chiúⁿ ní quidé-yu chi cuíta te ndóo-ná-yu duha, dico mèé-yu chi naníhí tãhũ-yu.

¹⁶ Te yúhú càháⁿ-í dóho-ndo dándacu-í iní-ndó sã cúú-ndó dàtná vehe Yá Ndiöxí, chi Espíritú-gá ndécú ndihí ñaha-xi xii-ndo. ¹⁷ Te núu yoo na dànaa ñaha xii nchohó ñáyiu cùu veñúhu-gá, te Yá Ndiöxí danàa ñaha-gá xii ñáyiu-áⁿ, te ducaⁿ càda-gá chi nchòhó cúú-ndó ñáyiu cùu cuendá-gá.

¹⁸ Te vá dándàhú-ndó mèe-ndo sã ïo túha-ndo. Te núu ïo dava-ndo sàni iní-ndó sã túha-ndo dàtná sání iní cue ñáyiu ñá túú ndècu ichi Yá Ndiöxí, te cada-ndo sã cúú-ndó dàtná ñáyiu ñá túú tñàhí túha, te ducaⁿ te cuu ndisa-ndo ñáyiu túha sã cúú-xí Yá Ndiöxí. ¹⁹ Te nchaa sá xìní tñùní nchaa ñáyiu

càchí sá ïo túha ñá túú ndècu ichi Yá Ndiöxí ñá túú nàndíhi-xi sá cúú-xí-gă. Te cächí-xi núú tùtú-gá: “Nchaa ñáyiú cächí sá ïo túha te Yá Ndiöxí dandöo canúú ñáhá-gă xií-yu núú nchàa sá quidé-yu”, duha cächí-xi núú tùtú-gá. ²⁰ Te cächí tucu-xi ìngá xichi: “Yá Ndiöxí cútnùní iní-gá nchaa nàcuáa sàni iní ñáyiú cächí sá ïo túha. Te nchaa nàcuáa sàni iní-yu-áⁿ cächí-gá sá ñà túú vèdana nàndíhi-xi”, duha cächí-xi núú tùtú-gá. ²¹ Núú xiăⁿ càháⁿ-í dóho-ndo sã vã cächí-ndó sã nchũhú cue tée dànèhé ñáhá xi-ndo tnúhu-gá ío cãhnu cuu-ndí. Te nchaa sá ío ñuyíú-a cùu-xi sá vãha sá cúú-xí-ndó. ²² Te cuèi yúhú ndihí té Àpolós ndihí té Pèlú ndécú-ndí sá cúú-xí-ndó, te cuèi nchaa sá ío ñuyíú-a te cuèi nchaa nduu ndècu-ndo te cuèi sá cùú-ndó dico nchaa cùu-xi sá vãha sá cúú-xí-ndó. Te cuèi nchaa sá ndécú tnàvii, te cuèi nchaa sá cóo ndèe cuèé-gá nchaa cùu-xi sá vãha sá cúú-xí-ndó. ²³ Te mee-ndo ndècu-ndo sá cúú-xí Xĩtohó Jesucrìstú, te mee Xĩtohó Jesucrìstú ndécú-gă sá cúú-xí Yă Ndiöxí.

4

Nàcuáa ndùu chiuⁿ quide cue tée ní táúchíúⁿ Xĩtohó Jesucrìstú càháⁿ tnúhu-gá

¹ Te cada cuèndá-ndó sã nchũhú dicó-ni cue tée xìnu cuechi núú Xĩtohó Jesucrìstú cúú-ndí, te chiuⁿ-áⁿ ñí taxi Yá Ndiöxí quidé-ndí càháⁿ-ndí tnúhu sá ñí cachí-gá yíyùhu ñí cuu. ² Te xìni ñuhu-xi sá ncháá ñáyiú ducaⁿ ñí sãñaha Yá Ndiöxí chiuⁿ quidé-yu cada ndáá-yu cadá-yu chiuⁿ-áⁿ. ³ Te yúhú ñá túú quide cuendá-í nũu nása ndùu tnúhu càháⁿ-ndó cuèndá-í nũu cùu-í tée váha àdi ñá túú

cùu-í. Te òu-ni ducaⁿ ñà túú quide cuendá-í nũ nása-gá càháⁿ nchaa dava-gá ñáyu cuendá-í. Te ni mée-í ñá túú càháⁿ-í nũ cùu-í tée váha àdi ñá túú cùu-í. ⁴ Te sànuu iní-í sá ñà túú nã cúmăni-í núú Yă Ndiõxí, dico ñá díú sã xĩaⁿ te cachí-í sá ñã túú cuěchi-í ndécú nũú-gă, chi mee-gă náhá ndăá-gá te núu nása quide-í ndécù-í. ⁵ Te nchòhó vá càháⁿ-gá-ndó sã ñà túú cundáá ñáyu núú Yă Ndiõxí, chi vátá sáa-gá nduu cundáá cuěchi-yu. Te na sáa nduu quixi tucu Xítohó Jesucrístú te dàvá-áⁿ dátúu-gá nchaa sá quidě-yu, nchaa sá ñà túú xini-ó quidé-yu vitna, te ducaⁿ dátúu-gá nchaa năcuáa sàni iní-yu. Te Yă Ndiõxí cáháⁿ váha-gá cuendá nchaa ñáyu ní quide váha.

⁶ Te nchòhó ñáyu ndècu ndihi-í ichi Xítohó Jesucrístú, càcunehe-í té Àpolós ndihi yúhú núú-ndó dànehé ñáhà-í xii-ndo năcuáa cada-ndo cuendá ducaⁿ cùu-xi ìⁿ sá váha sá cúu-xí-ndó, ndihi cuendá sá nchòhó canchicúⁿ nihnu-ndo càda-ndo mee-ni nchaa năcuáa yòdo tnuní núú tûtú Yă Ndiõxí. Te ducaⁿ te vá càchí-ndó sã ìⁿ tée càháⁿ tnúhu Yă Ndiõxí ío-gá càhnu cuu-dé dăcúúxí ìngá-dé. ⁷ Te nchòhó vá càchí-ndó sã ío-gá cùnũu-ndo dăcúúxí dăva-gá ñáyu chi Yă Ndiõxí ní quide-gá ní ngúndecu ndihi-ndo nchàa sá xini tnùn-í-ndó. Te mee-gă ducaⁿ ñi quide-gá ¿Te ná cuendá nchòhó ducaⁿ quide cahnu-ndo mee-ndo? Te quide-ndo datná tnúhu sá mée-ndó ñi quide-ndo dùcaⁿ ní ngúndecu ndihi-ndo nchàa sá xini tnùn-í-ndó.

⁸ Te nchòhó quidé-ndó sã ñà túú tnàhí-gá ná cúmăni-ndó nũú Yă Ndiõxí, te quide-ndo sá ni ñihí-ndó nchàa sá cuini-ndó nũú-gă ndécú ndihi-ndo, te sànuu sá cúu-nă-ndó datná cue tée

yìndaha ñáyiu, te nchúhú ñá túú cùu ìⁿnuu ndihi ñaha-ndí xii-ndo quìndaha ndihi ñaha-ndí xii-ndo ñáyiu, ÿte váha-ni te núu dìcò ndisa sá yìndàha-ndo ñáyiu chi tnàhá nchúhú ní tnahá ndihi ñaha-ndí xii-ndo quìndaha-ó-yu te núu dìcò cúú-xí ìⁿ sá ndàá dico ñáhá! ⁹ Te yúhú quidé cuèndá-í sá nchúhú cue téé ní táúchíúⁿ Xìtohó Jesucrìstú cáháⁿ tnúhu-gá núú ñáyiu ní cachí Yă Ndiöxí sá cúú-ndí cue téé ñá túú nàndíhi sá cúú-xí dâva-gá ñáyiu. Te ní cachí tucu-gá sá cúú-ndí dâtná cue ñáyiu sa ní tnahá òré cuú-xi quíhíⁿ nacháhu cuéchi-xi, te nchaa ñáyiu cùñúhu ñáhá-yu xii-ndí sá dúcáⁿ ndòho-ndí, te tnàhá nchaa espíritú cùñúhu ñaha-xi xii-ndí. ¹⁰ Te cuèndá sá xínú cuèchi-ndí núú Xìtohó Jesucrìstú, xíⁿ cúú-ndí dâtná cue téé ñá túú vèdana nàndíhi sá cúú-xí ñáyiu. Te nchòhó quidé-ndó sá cúú-ndó ñáyiu ío túha ndècu ndihi Xìtohó Jesucrìstú. Te ñáyiu càchí-yu sá nchúhú cúú-ndí cue téé ñá túú ndàcu cada ìⁿ sá cádá sá cúú-xí Yă Ndiöxí. Te nchòhó quidé-ndó sá cúú-ndó ñáyiu ío váha ndàcu quide ìⁿ sá sání ìní-ndó sá cúú-xí-gă. Te cue ñáyiu dàquee tihú ñáhă-yu xii-ndí, te nchòhó néhě-yu sá yíñúhu núú-ndó. ¹¹ Te nchúhú chi nchaa-ni nduu ío ndòho-ndí, chi xihí-ndí docó, yìchí-ndí ndute, te ñá túú dõó-ndí, te nchaa ñáyiu quide úhú ñáhă-yu xii-ndí, te ni vèhe-ndí ñá túú ndèé cáá cùndecu-ndí. ¹² Te ío ndòho-ndí quidé chiuⁿ-ndí nihí-ndí sá xéxí-ndí. Te cue ñáyiu xìcuèhé ñáhă-yu xii-ndí dico xìcáⁿ táhú-ndí núú Yă Ndiöxí cuèndá-yu, te ñá cúú

tnàhí quiní ndeé ñáhă-yu xii-ndí dico quide cahnu iní-ndí nchaa sá quidé ñáhă-yu. ¹³ Te mee-ni tnũhu cuèhé tnũhu duha càháⁿ-yu cuendá-ndí dico sàcahnu iní-ndí te dàsahú-ndí-yu mee-ni tnũhu váha. Te càchí-yu sá cúú-ndí dàtná ìⁿ sá ñà túú-gă vèdana nàndihí, te nchaa-ni nduu ducaⁿ càháⁿ-yu xăhăⁿ-yu xii-ndí.

¹⁴ Te yúhú duha càháⁿ-í núú tùtú-a dàsahú ñáhà-í xii-ndo, dico ñá díú tnũhu sá cúú càháⁿ núú-ndó càháⁿ-í. Te duha càháⁿ-í dóho-ndo chi quide iní-í sá sũúní dàtná déhe mee-í cúú-ndó chi ío cùu iní ñáhà-í xii-ndo. ¹⁵ Te nchaa-o ndècu-o ichi Xítóhó Jesucrístú vitna, dico yúhú cúú-í téé díhna nuu ní dánèhé ñáhă xii-ndo nacuáa nduu tnũhu sá càháⁿ nacuáa naníhí tãhú-ó, núu xiăⁿ cúú-í dàtná tãtá-ndó. Te cuéi vâi vihi cue téé na quixi-güedé danèhé ñáhă-güedé xii-ndo tnũhu-gă dico ìⁿ ðii-ni yúhú cúú-í téé díhna nuu-gă ní dánèhé ñáhă xii-ndo tnũhu-gă. ¹⁶ Núu xiăⁿ càháⁿ-í dóho-ndo sã cáncchícúⁿ nihnu-ndo càda-ndo nchaa nacuáa quide-í.

¹⁷ Te xiăⁿ nõu sa ní tendaha-í té Timùteú véxi coto ñaha-dé xii-ndo, te téé-áⁿ ío cùu iní-í-dé te quide ndáá-dé, te cùu-dé dàtná déhe-í chi yúhú ní sanu ichi-í-dé ichi Xítóhó Jesucrístú, te téé-áⁿ cachí tnũhu-dé xii-ndo nchaa nacuáa quide-í ndécù-í ichi-gă. Te ðiu-ni nacuáa na càchí tnũhu-dé-áⁿ ðiu-ni ducaⁿ quide-í nchaa xichi núú tàcá ñáyiu dàcuaha tnũhu Xítóhó Jesucrístú. ¹⁸ Te dava nchòhó ío quide cahnu-ndo mee-ndo chi sàni iní-ndó sã vă quixí-gă-í quixi coto ñaha-í xii-ndo. ¹⁹ Dico núu mee Yă Ndiõxí ná càchí-gă te ío ndĩhi quixi coto ñaha-í xii-ndo, te dàvá-áⁿ quiní-í te núu nása

quide nchaa ñáyiú ducaⁿ ño xǐquide càhnu mee-xi-áⁿ ndécũ-yu ichi Xítóhó Jesucrístú. Te vá cáda cuèndá-í tnúhu càháⁿ-yu chi chiùⁿ quidé-yu cada cuèndá-í. ²⁰ Te vitna yìndaha ñaha Yá Ndiöxí xii-o, te chìndee ñaha-gá xii-o quide-o nchaa sá vǎha sàni iní-ó quide-o te ñá díú mèe-ni sá càháⁿ-ó. ²¹ Te ío chí cání iní nũ ndèdacàa sá vǎha-gá cada-í òré ná quèxió-í núú ndécú-ndó, núú sá ténàá ñáhà-í xii-ndo àdi sá càháⁿ ndìhi ñaha-í xii-ndo ndìhi tnúhu vii tnúhu vǎha nàcuáa cutnùnì iní-ndó sá cúú iní ñáhà-í xii-ndo.

5

Iⁿ cuéchi càhnu vihi

¹ Te yúhú sa ní níhí ndǎá-í tnúhu nàcuáa cùu ndecu-ndo, chi ñⁿ téé ndècu ndìhi-ndo ndeca-dé nǎná chàhá-dé. Te xǐáⁿ cúú-xí ñⁿ cuéchi càhnu vihi, chi ndéé nchaa ñáyiú ñá túú ndècu ichi Yá Ndiöxí càchí-yu sá vǎ cúú tnàhí ducaⁿ càda-o. ² ;Te nchòhó ío quide cahnu-ni-ndo mee-ndo xíndecu-ndo! ;Te tàú-ndó sǎ cùndìyí-ndó ndìxi cuéchi iní-ndó sǎ dúcáⁿ cùu ndecu-ndo ni cuu! Te téé ducaⁿ quide-áⁿ xíní ñùhu-xi sá vǎ dáñá-gǎ-ndó ñihí tnáhá ndìhi ñaha-dé xii-ndo ni cùu dico ñá túú dùcaⁿ quide-ndo. ³ Te yúhú ñá túú ndècu ndìhi ñaha-í xii-ndo dico dàtná tnúhu sá ndécú ndìhi ñaha-í xii-ndo chi ducaⁿ-ni ño ñùhu iní ñáhà-í xii-ndo. Te yúhú càchí-í sá náchǎhu téé-áⁿ cuéchi-dé sá dúcáⁿ quide-dé, te ñiú-ni ducaⁿ cǎháⁿ-í núú-ndó te núú dìcò ndécú ndìhi ñaha-í xii-ndo. ⁴ Te òré nátàcá-ndó càháⁿ ndìhi-ndo Yá Ndiöxí te ñiú-ni Xítóhó Jesucrístú ñá túú dàña ndéé-gá chíndèe ñaha-gá xii-ndo, te òré-áⁿ cada-ndo nàcuáa cuìní Xítóhó Jesucrístú

cada-ndo, te cada iní-ndó sã tnáhá-í ndécú ndìhi ñaha-í xii-ndo. ⁵ Chi tàú-xi sá tẽe ducaⁿ quide-án daquèe tíhú-ndó-dě, te ducaⁿ te sácuihná dandòho ñaha-xi xii-dé cuẽi na cùú-dé, dico na sàá nduu te nduu táhú-dě cundecu-dé ndìhi Xítóhó Jesucristú.

⁶ Te nchòhó ñá túú ndùu váha-xi sá càchí-ndó sã ïo càhnu cuu-ndo. Te xini-ndó sã cuẽi luha-ni levadùrá ná quíhu yuchi cuáha pàá dándaa-xi cuẽi luha-ni nà quíhu te ñihí-ni yuchi sàháⁿ ndoho-xi. Te ducaⁿ sãtnahá-xi cùu nchohó chi núu ndècu ndìhi-ndo ìⁿ ñáyiú quide sá ñá túú váha te nchaa-ndo ñà túú-gã cúú váha iní-ndó ndècu-ndo.

⁷ Te xini ñuhu-xi sá cáda-ndó dàtná quidé cuè ñáyiú quide vico pascuá, chi ñá túú chihí-yu levadùrá yuchi cuáha pàá xéxí-yu nduu quidé-yu vico-án. Te sá quíhu pàá-án cada iní-ó sã cúú-xí nchaa sá cuèhé sá dúhá ñi xóo cada-ndo. Te vá cáda-gã-ndó ñi ìⁿ sá cuèhé sá dúhá, te ducaⁿ te cuu-ndo ñáyiú váha chi sa ní nduu ndoo ní nduu nine iní-ndó. Te cue mbéé cue quiti ní xóo cahni-güedé nduu pascuá cue quiti-án cada iní-ó sã cúú-güedi datná Xítóhó Jesucristú nàcuáa ní xihí-gá núú cùrúxí. ⁸ Te núu xíáⁿ xini ñuhu-xi sá vã cáda-gã-ndó ñi ìⁿ sá cuèhé sá dúhá sã ñi xóo cada-ndo, te ni vã cúhúⁿ-gã iní-ndó te ni vã cáda-gã-ndó, te ni yùhu ñi iní-ná-ndó càda-ndo mee-ñi sá váha.

⁹ Te tutú sá sà ní dáquíxì-í ndaha-ndo ñi cachí-í sá vã ñihí tnáhá-ndó ndìhi cue ñáyiú ndècu ichi díí iní. ¹⁰ Te sá dúcáⁿ càháⁿ-í núú tütú ní dáquíxì-í ndaha-ndo te vá cáni iní-ndó sã yùhú càchí-í sá vã cúú-gã tnahá tnúhu-ndo ndìhi cue ñáyiú ndècu ichi cuehé ichi duha, ndìhi ñáyiú ndècu ichi díí

ìní, ndìhì ñáyíu xìho nchaa sá ìó ñuyíú, ndìhì ñáyíu dùhu sá ndécú ndìhì tnahà ñáyíu-xi, ndìhì ñáyíu quìde cahnu sá càchí-yu cùu ndióxí te ñá ndàá sá ndiöxí cúú-xí chi dìcò cue téé ñuyíú-a ní cadúha nchaa xíáⁿ, chi núu ducaⁿ na càda-ndo vá tnàhá tnúhu-gá-ndó ndìhí-yu te xìni ñuhu-xi sá vǎ cùndècu-gá-ndó nǔú ndécǔ-yu. ¹¹ Te ñá túú dùcaⁿ quee-xi nacuáa càháⁿ-í núú tütú-í, chi yúhú càchí-í sá vǎ cúú tnàhá tnúhu-ndo ndìhì ñáyíu càchí sá ndécú ìchi Xítóhó Jesucristú te ñá ndàá sá ndécǔ-yu ichi-gá. Te núu cùú-yu ñáyíu ndècu ichi díí ìní, àdi cuú-yu ñáyíu xìho nchaa sá ìó ñuyíú-a, àdi cuú-yu ñáyíu quìde cahnu nchaa sá càchí-yu cùu ndióxí te ñá ndàá chi dìcò cue téé ñuyíú-a ní cadúha nchaa xíáⁿ, àdi cuú-yu ñáyíu yiti yùhu-xi, àdi cuú-yu ñáyíu quihu, àdi cuú-yu ñáyíu dùhu sá ndécú ndìhì tnahà ñáyíu-xi, te nchaa ñáyíu ducaⁿ càchí sá ndécú ìchi-gá te ñá ndàá te ducaⁿ xǐquidé-yu, te ni vǎ cúú ìhí tnàhá-ndó ndìhí-yu caxi-ndo ndìhí-yu. ¹²⁻¹³ Te ñá díú yǔhú cúú-í téé cáháⁿ cuendá nchaa ñáyíu ñá túú ndècu ichi Xítóhó Jesucristú nǔu quìde ndáá-yu àdi ñá túú quìde ndáá-yu ndécú-yu, chi mee Yǎ Ndiöxí cáháⁿ-gá te núu nása quìdé-yu ndécú-yu. Dico nchòhó chi tàú-ndó càda cuendá-ndó nǔu nása quìde cue ñáyíu ndècu ndìhì-ndo ichi Xítóhó Jesucristú. Núu xíáⁿ xíní ñùhu-xi daquee tíhú-ndó tǎe ducaⁿ ñá túú quìde váha ndècu ndìhì-ndo-áⁿ, te vá dáñá-gǎ-ndó ìhí tnàhá ndìhì ñaha-dé xii-ndo.

Nàcuáa tàú-xi cada ñáyiú ndècu ichi Xítóhó Jesucristú te núu ñá túú ndècu ndìhi váha tnàhá-yu

1 Te dava nchòhó òré ñá túú ndècu ndìhi váha tnàha-ndo te cùyii-ndo cuáháⁿ-ndó núú cuè téé cùchiuⁿ ñá túú ndècu ichi Xítóhó Jesucristú sàcáⁿ cuéchi-ndo, te ñá túú dùcaⁿ taú-xi cada-ndo chi núú cuè téé ndècu ichi-gá ducaⁿ tàú-ndó quìhíⁿ-ndó càcáⁿ cuéchi-ndo. 2 Te nchòhó sa nàha-ndo sá ncháá ñáyiú cùu cuendá Yá Ndiòxí sáá nduu cǎháⁿ-yu te núu ní quide ndáá nchaa dava-gá ñáyiú àdi ñá túú ní quide ndáá-yu, te nchòhó tnàhá-ndó cùu-ndo ñáyiú ducaⁿ cǎháⁿ, te núu ducaⁿ te cutnùní iní-ndó sǎ ndácú-ndó càda ndáá-ndó nchàa cuéchi sá ñá túú ùhú cundáá vitna ndècu-ndo ñuyíú-a. 3 Te nchòhó sa nàha-ndo sá ncháá ndéé cue espíritú xínú cuéchi núú Yá Ndiòxí sáá nduu cǎháⁿ-ó te núu nása quide-xi ndecu-xi. ¡Núu xǎⁿ cùtnùní iní-ó sǎ úúⁿ-gǎ ndacu-o càda ndáá-ó nchàa cuéchi sá ió ñuyíú-a! 4 Te núu ió dava-ndo ió nása cùu ndecu-ndo te xǎnàá-ndó, te vá quìhíⁿ-ndó càcáⁿ cuéchi-ndo núú cuè téé ndèhe-ndo sá ñá túú ndècu-güedé ichi Yá Ndiòxí, dico nchòhó chi da núú cuè téé-áⁿ cuáháⁿ-ndó sàcáⁿ cuéchi-ndo. 5 Te duha cǎháⁿ-í cuendá cucahaⁿ núú-ndó chi ñá túú quide váha-ndo sǎ dúcáⁿ quide-ndo. ¿Te náa dicó-nǎ ñá túú tnàhí ìⁿ téé cùtnùní iní-xi nàcuáa cada ndáá cuéchi-ndo ndècu ndìhi-ndo ichi Xítóhó Jesucristú-ǎⁿ? 6 Te nchòhó, ñá túú quide váha-ndo, chi dava-ndo cuáháⁿ-ndó núú cuè téé ñá túú ndècu ichi Xítóhó Jesucristú sàcáⁿ cuéchi-ndo cuendá dava-gá cue ñáyiú ndècu ndìhi-ndo ichi-gá. 7 Te ñá túú quide váha-ndo sǎ dúcáⁿ nàá ndìhi tnàha-ndo te cuáháⁿ-ndó sàcáⁿ cuéchi-ndo, te váha-gá sá cádá cǎhnu iní-ndó cuèi nándí na

càda ñaha tnaha ñáyi-ndo xii-ndo cuéi dùhú-yu sá ndécú ndìhi-ndo dico cada càhnu-ni iní-ndó. ⁸ Dico nchòhó chi ñá túú quide cahnu iní-ndó chi da uuⁿ-gá ñá túú quide váha-ndo sàcúú-xí tnàha ñáyi-ndo, chi cùu úhú iní-ndó-yu, te dùhu-ndó-yu, te ndéé méé-ndó nàcuáa ndècu-ndo ichi Xítohó Jesucristú ducaⁿ quide tnaha-ndo.

⁹ Te nchòhó sa nàha-ndo sá ncháá ñáyi ndècu ichi cuehé ichi duha vá ndúú tãhũ-yu cundecú-yu núú ndécú Yã Ndiõxí táxí tnùní-gá, núu xíãⁿ vá cání iní-ndó sã ñáyi-áⁿ nduu tãhũ-yu cundecú-yu ndìhi-gá. Te ni cuè ñáyi ndècu ichi díí iní, te ni cuè ñáyi quide cahnu nchaa sá càchí-yu cùu ndiõxí te ñá ndáá chi dícó cue téé ñuyíú-a ní cadúha nchaa xíãⁿ, te ni cuè téé càháⁿ ndìhi ñadìhí te ñá díú ñadìhí-güedé cúũ-yu, te ni cuè ñáyi dìhí càháⁿ ndìhi téé te ñá díú yíi-yu cùu-güedé, te ni cuè téé càháⁿ ndìhi tnàha téé-xi, ¹⁰ te ni cuè ñáyi dùhu, te ni cuè ñáyi xìho sá ndécú ndìhi tnaha ñáyi-xi, te ni cuè ñáyi quihu, te ni cuè ñáyi càháⁿ úhú, te ni cuè ñáyi dãnícuehé tnàha ñáyi-xi te dùhu ñahá-yu, te ni ñⁿ cue ñáyi duha xíquide vá ndúú tãhũ-yu cundecú-yu núú ndécú Yã Ndiõxí táxí tnùní-gá. ¹¹ Te dava nchòhó ducaⁿ ñí xóo cada-ndo ni cùu, te vitna ní cuu-ndo ñáyi sa ní nduu ndoo ní nduu nine iní-xi, te ní cuu-ndo ñáyi cùu cuendá Yã Ndiõxí, te ní cuu tucu-ndo ñáyi ñá túú-gã cuéchi-xi ndècu núú-gã. Te ducaⁿ ñí quide ñaha Yã Ndiõxí xii-ndo sã vãha sá cuendá Xítohó Jesucristú, te ní ngúndecu ndìhi-ndo Espíritú Yã Ndiõxí.

Nàcuáa ndi-ndu cuendá yiqui cùñú-ó

12 Te càchí ñáyiú sá ncháá sã sání ìní-ó cuu cada-o, te ndáá càháⁿ-yu òcò-ni sá ñã ncháá cùu-xi sá vãha sá cúú-xí-ó. Te núu cuìní nchaa sá sání ìní-ó-ãⁿ taxi tnùnì ñáhá-xí te vã cádá-ó. ¹³ Te nchòhó sa xìnì-ndó sã ncháá sã xéxí-ó cuãnguee-xi xití-ó, te xití-ó ñi cuáha tnàhí-xi sá cúhúⁿ nchàa sá cáxí-ó, dico xití-ó ndìhì nchaa sá xéxí-ó chi naa-xi. Te Xítohó Jesucristú néhé cuendá-gá yìqui cuñú-ó, te ducaⁿ yìqui cuñú-ó cùu-xi cuendá-gá, te ñã túú ní cuãha yìqui cuñú-ó sã cúndècu-xi ichi ðí ìní. ¹⁴ Te dàtná ní quide Yá Ndiõxí ní dándótó-gã Xítohó Jesucristú ducaⁿ càda ñaha-gá xii nchoo tùcu chi dandòto ñaha-gá xii-o núu na cùú-ó, chi ndàcu-gá quidé-gã nchaa sá vãha.

¹⁵ Te nchòhó sa nàha-ndo sá yìqui cuñú-ó cùu-xi cuendá Xítohó Jesucristú chi ìⁿ-ni cùu-o ndìhì-gá, núu xíãⁿ ñã túú tnàhí ndùu váha-xi cáháⁿ ndìhì-o ñáyiú ndècu ichi ðí ìní, chi yìqui cuñú-ó cùu-xi cuendá Xítohó Jesucristú, te núu ducaⁿ na càda-o te cada iní-ó sã cuendá-nã ñáyiú-áⁿ cúú yìqui cuñú-ó, núu xíãⁿ ñã túú tnàhí ndùu váha-xi ducaⁿ càda-o.

¹⁶ Te sa xìnì-ndó sã núu ìⁿ téé na càháⁿ ndìhì-dé ìⁿ ñadìhì ndécú ichi ðí ìní te cada iní-ó sã ìⁿ-nã yìqui cuñú cúú-yu. Te ducaⁿ càháⁿ-xi núu tütú Yá Ndiõxí núú càchí-xi: “Ìⁿ téé na càháⁿ ndìhì-dé ìⁿ ñadìhì te ìⁿ-nã yìqui cuñú cúú-yu”, duha càchí-xi. ¹⁷ Te ducaⁿ sãtnhá-xi cùu nchaa ñáyiú tnàhá tnúhu ndìhì Xítohó Jesucristú, chi ìⁿ-nã cúú-yu ndìhì-gá.

¹⁸ Te núu xíãⁿ càháⁿ-í dóho-ndo sã vã cúndècu-ndo ichi ðí ìní, chi núu ducaⁿ na càda-ndo te ñã túú tnàhí sá vãha cùu-xi sá cúú-xí yìqui cuñú-ndó chi ío dàcuíta nihnu-xi yìqui cuñú-ndó. Te nchaa dava-gá sá cuèhé sá dúhá ñã túú quide-xi yìqui

cuñú-ndó dàtná quidé xǎⁿ. 19 Te nchòhó sa cùtnuní iní-ndó sǎ yìquì cuñú-ndó cùu-xi datná ìⁿ vehe núú ndécú Espíritú Yǎ Ndiǒxí. Te ducaⁿ sǎtnhá-xi cùu yìquì cuñú-ndó chi ndècu-ndo ndìhì Espíritú-gá. Te mee-gǎ ní taxi-gá Espíritú-gá ndécú ndìhì-ndo, te ñǎ díú mèe-ndo cuu cuendá-ndó mèe-ndo chi Yá Ndiǒxí cúú cuendá ñáhá-gǎ xii-ndo. 20 Te ducaⁿ cùu-ndo ñáyiu cùu cuendá Yǎ Ndiǒxí chi Xítóhó Jesucrístú ní nacháhu-gá nchaa yíca cuèchi-ndo. Te núu xǎⁿ xíní ñùhu-xi sá ñìhí ní ndúú-ndó càda-ndo nacuaa cuu cǎhnu Yá Ndiǒxí, te ducaⁿ tàú-xi cada-ndo chi espíritú-ndó ndìhì yìquì cuñú-ndó cùu-xi cuendá-gá.

7

Sáhú sǎ cúú-xí ñáyiu ní tnándaha

1 Te ní quexìo tutú sá ñí dáquixí-ndó ndàha-í, te vǐtna na cǎchí tnúhu-í xii-ndo cuendá tnúhu cǎháⁿ-ndó nǔú tütú-ndó. Te vǎha cada-xi te núu vǎ cándèca tée ñadìhí, te ducaⁿ-ni vǎha cada-xi te núu ñáyiu dìhí vǎ cándècá-yu tée. 2 Te dìcò-ni sá nǔu ducaⁿ na càda-ndo te dava-ndo cànì iní-ndó cùndecu-ndo ichi díí ìní. Núu xǎⁿ xíní ñùhu-xi sá ncháá cuè tée ndì dííⁿ cùndecu ñadìhí-güedé, te ducaⁿ-ni tucu nchaa cue ñáyiu dìhí ndì dííⁿ cùndecu yí-yu. 3 Te cǎchí tnúhu-í xii-ndo sǎ ncháá cuè tée vǎ cúú cǎchí-güedé sá vǎ cúú cǎháⁿ ndìhì-güedé ñadìhí-güedé, te dìu-ni ducaⁿ cuè ñáyiu dìhí tucu, vǎ cúú cǎchí-yu sá vǎ cúú cǎháⁿ ndìhì-yu yí-yu. 4 Te nchaa cue ñáyiu dìhí chi ñǎ díú mèe-ní-yu cùu cuendá-yu yìquì cùñú-yu chi tnàhá cúú cuendá

yí-yu, te ducaⁿ-ni nchàa cue tée tucu chi ñá díú-ní mèe-güedé cúú cuendá-güedé yiqui cùñú-güedé chi tnàhá cúú cuendá cue ñadìhí-güedé. ⁵ Te cue tée vá cúú càchí-güedé sá vǎ cúú cǎháⁿ ndihí-güedé ñadìhí-güedé. Te ni cuè ñáyiú dìhí vá cúú càchí-yu sá vǎ cúú càháⁿ ndihí-yu yí-yu. Àdi te núu ní ndatnúhu-yu sá vǎ dúcáⁿ càdá-yu ìⁿ úú nduu cuendá sá cuíní-yu ío cǎháⁿ ndihí-yu Yá Ndiöxí, dico nà yáha núu ná daha nduu ducaⁿ ñí ndatnúhu-yu sá vǎ dúcáⁿ càdá-yu te naníhí tnàhá tucú-yu, chi núu ñáhá te cudana te vá cuácàhnu iní-yu te sácuíhná dacáháⁿ ñáhá-xí xii-yu cadá-yu sá ñà túú tàú-yu cadá-yu.

⁶ Te tnúhu càháⁿ-í-a quèe-xi sá tǎe ndihí ñadìhí cuu candeca tnàhá-yu dico ñá túú quède yica-í sá dúcáⁿ càdá-yu. ⁷ Te yúhú sání iní-í sá núu dícó sá cúú te nchaa-ndo cùndecu-ndo datná ndécù-í, dico ñáhá chi mee Yá Ndiöxí ní cachí-gá nàcuáa nduu táhú-ó ìⁿ ìⁿ-o cundecu-o, chi dava-o ñí cutáhú-ó núú-gǎ sá cùndècu ñadìhí-ó te dava-o ñáhá. ⁸ Te càchí tnúhu-í xii nchòhó cue tée vátá ñihí-gá ñadìhí-xi sá vǎha-gá sá núu vá cùndècu ñadìhí-ndó datná yúhú. Te ducaⁿ-ni nchòhó cue ñáyiú dìhí ñáyiú vátá ñihí-gá yì-xi sá vǎha-gá sá núu vá cùndècu yì-ndo. Te diu-ni duha càháⁿ-í sá cúú-xí nchàa nchohó ñáyiú dìhí ní quendóo quèe sá vǎha-gá sá núu vá cándèca-gá-ndó tǎe. ⁹ Te càchí tnúhu-í xii nchaa-ndo sǎ núu xito-ndo sá vǎ cùndèe iní-ndó cùndecu mee-ndo te vǎha-gá sá núu tnándaha-ndo, te ñá díú sǎ méé-ní cànì cuehé canì duha iní-ndó cùndecu-ndo.

10 Te nchaa nchòhó ñáyiú sa ní tnándaha càháⁿ-í dóho-ndo, te ñá díú mèe-í duha càhu iní-í càháⁿ-í dóho-ndo chi Xítohó Jesucristú ducaⁿ dàcahu iní ñáhá-gă xii-í, chi mee-gă cuìní-gá cada-ndo nàcuáa na càháⁿ-í-a. Te nchaa nchòhó cue ñáyiú dìhí càháⁿ-í dóho-ndo sã vã dáñá-ndó yì-ndo. 11 Te núu ío dava-ndo sã ní dáñá-ndó yì-ndo, te xìni ñuhu-xi sá vã cándèca-gá-ndó tõe, chi cundecu mee-ñã-ndó àdi núu ñáhá te naqueheⁿ tucu-ndo tõe ní cuu yì-ndo. Te nchaa nchòhó cue tée ndècu ñadihí-xi càháⁿ-í dóho-ndo sã vã dáñá-ndó ñáyiú cùu ñadihí-ndó.

12 Te tnúhu na càháⁿ-í-a cùu-xi sá nĩ sani iní mèe-í te ñá díú tnúhu sá nĩ cachí Xítohó Jesucristú cáháⁿ-í cúu-xí. Te núu dava nchòhó cue tée ndècu ichi Xítohó Jesucristú ndécá-ndó ñáyiú dìhí ñáyiú ñá túú ndècu ichi-gá, te vá dáñá-ndó-yu te núu cùu váha iní-yu ndèca ñahá-yu xii-ndo. 13 Te núu dava nchòhó cue ñáyiú dìhí ñáyiú ndècu ichi Xítohó Jesucristú ndécá-ndó cuè tée ñá túú ndècu ichi-gá te vá dáñá-ndó-güedë te núu cùu váha iní-güedé ndécá ñaha-güedé xii-ndo. 14 Te núu ìⁿ tée ñá túú sàndáá iní-dé Xítohó Jesucristú te ñadihí-dé sàndáá iní ñáhá-áⁿ xii-gá, te tée-áⁿ nĩ cuu-dé ìⁿ tée sa ní cuyatni tnahá tnúhu ndihí ñaha xii-gá sá cuendá ñadihí-dé. Te ducaⁿ sãtnahá-xi cùu tucu ñadihí ñá túú sàndáá iní ñáhá xii Xítohó Jesucristú te yì-aⁿ sàndáá iní ñáhá-dë xii-gá, te ñaha-áⁿ sa ní cuyatni tnahá tnúhu-aⁿ ndihí-gá sá cuendá yì-aⁿ, te ñu-ni ducaⁿ sãtnahá-xi cùu cue landú-yu chi sa ní cuyatni tnahá tnúhu-güexi ndihí-gá. Te núu vá dúcáⁿ cùu te cue landú-yu-áⁿ ïo xica cùndecu-güexi núú-gă.

15 Te núu ñí tée ñá túú sàndáá iní ñáhá xì Xítóhó Jesucristú cuíní-dé dañá tnàha-dé ndihí ñàdihí-dé ñaha sàndáá iní ñáhá xì Xítóhó Jesucristú, te ñu-ni na càda-dé nàcuáa sàni iní-dé. Te ñu-ni ducaⁿ tùcu te núu ñàdihí ñaha ñá túú sàndáá iní ñáhá xì Xítóhó Jesucristú cuíní-aⁿ dañá-aⁿ tée sàndáá iní ñáhá xì-gá, tée cùu yí-aⁿ te ñu-ni na càda-aⁿ nacuáa sàni iní-aⁿ. Chi tée sàndáá iní ñáhá xì Xítóhó Jesucristú ñá túú tàú-dé cada yica-dě ñàdihí-dé cundecu ndihí ñaha-aⁿ xì-dé te núu ñá túú cuíní-aⁿ. Te ñu-ni ducaⁿ ñàdihí ñaha sàndáá iní ñáhá xì-gá ñá túú tàú-aⁿ cada yica-aⁿ cundecu ndihí ñaha yí-aⁿ xii-aⁿ te núu ñá túú cuíní-dé cundecu ndihí ñaha-dě xii-aⁿ, chi Yá Ndióxi cuíní-gá sá ncháa nchòo ñáyíu ndècu ichi-gá cundecu váha-o vǎ nàá-ó. 16 Chi cue tée sàndáá iní tnúhu Xítóhó Jesucristú ñá túú cùtnuní iní-güedé te núu ndacu-güedé canu ichi-güedé ñàdihí-güedé ichi-gá àdi ñáhá te núu ñá túú sàndáá iní ñáhá-yu xii-gá, te ducaⁿ-ni cue ñáyíu ñí sàndáá iní tnúhu Xítóhó Jesucristú ñá túú cùtnuní iní-yu te núu ndacú-yu canu ichí-yu yí-yu ichi-gá àdi ñáhá te núu ñá túú sàndáá iní ñáhá-güedě xii-gá.

17 Te duha na càchí tnúhu-í xii-ndo, nchaa chiⁿ ní nduu táhú-ndó nǔú Yá Ndióxi quidé-ndó ndéé cùtnàhá ní cáháⁿ ñáhá-gǎ xii-ndo ñí natuha-ndo ìchi-gá te ñu-ni chiⁿ-áⁿ cada-ndo cundecu-ndo. Te nchaa xichi núú tàcá ñáyíu dàcuaha tnúhu-gá ñu-ni duha càháⁿ-í dóho-yu. 18 Te nchaa cue tée ndècu seña ñí-xi dàtná ní cachi ndíi Moisés, cue tée ní cáháⁿ Yá Ndióxi ndécú ìchi-gá, te ñu-ni ducaⁿ cùnduu-güedé cundecu-güedé, te nchaa cue tée ñá túú ndècu seña ñí-xi ní cáháⁿ-gá cundecu ichi-gá,

d̄i-u-ni ducaⁿ c̄unduu-ḡüedé cundecu-ḡüedé vá cuãha-ḡüedé s̄eñá ñ̄i-ḡüedé. ¹⁹ Te ñ̄i-ni c̄uu-xi cuéi na cuãha-o s̄eñá ñ̄i-o àdi vá cuãha-o. Te sá ïo-gá x̄ini ñ̄uhu-xi cada-o x̄iãⁿ cúu-xi sá cáda-ó nchaa nacuaa cuini Yá Ndiõxí. ²⁰ Chi x̄ini ñ̄uhu-xi sá c̄undecu-ni-o datná ndécú-ó c̄utnãhá ní cáháⁿ ñ̄áhá Yá Ndiõxí xii-o ñ̄i nḡundecu-o ìchi-gá. ²¹ Te núu c̄uu-ndo ñ̄áyiu ñá túu tnàhí dàñá quee núu chíuⁿ pàtróoⁿ-xi c̄utnãhá ní cáháⁿ ñ̄áhá Yá Ndiõxí xii-ndo, te ñá túu nã cani iní-ndó, dico núu dàña ñaha patróoⁿ-ndó quee-ndo núu chíuⁿ-ndó te váha-ni quee-ndo núu chíuⁿ-ndó. ²² Te sáta ñ̄i cáháⁿ ñ̄áhá X̄itohó Jesucristú xii nchòhó ñáyiu ducaⁿ ñã túu tnàhí dàñá quee núu chíuⁿ pàtróoⁿ-xi-áⁿ, te ní cuu-ndo dàtná ñáyiu dàñá queé núu chíuⁿ pàtróoⁿ-xi sá cúu-xi-gã, te ducaⁿ chi ñá túu-gã ndécú-ndó ìchi cuehé ìchi duha. Te nchòhó ñáyiu dàñá queé núu chíuⁿ pàtróoⁿ-xi c̄uu-ndo datná ñáyiu ñá túu tnàhí dàñá quee núu chíuⁿ pàtróoⁿ-xi sá cúu-xi X̄itohó Jesucristú, te ducaⁿ chi x̄inu cuechi-ná-ndó núu-gã. ²³ Te Yá Ndiõxí ní nduu cuendá ñáhá-gã xii-o chi X̄itohó Jesucristú ní nacháhu-gá nchaa yíca cuèchi-o sã ndécú núu Yá Ndiõxí ní c̄uu, te vá dàñá-ndó sã tnàha ñáyiu-ndo nàdatuhú iní ñáhã-yu xii-ndo vã cúnú cuèchi-ndo núu X̄itohó Jesucristú nàcuáa tàú-xi cunduu. ²⁴ Te núu x̄iãⁿ càchí tnúhu-í xii nchaa nchòhó ñáyiu ndècu nd̄ihi-í ìchi X̄itohó Jesucristú sá c̄undecu-ni-ndo datná-ni ndècu-ndo ndéé c̄utnãhá ní cáháⁿ ñ̄áhá-gã xii-ndo, te d̄i-u-ni ducaⁿ c̄undecu-ndo ìchi-gá.

²⁵ Te càchí tnúhu tucu-í xii-ndo sã X̄itohó Jesucristú ñá túu càchí tnúhu-gá xii-í núu nása cáháⁿ-í cuendá nchaa ñáyiu vátá tnãndaha-gá. Te duha

sàni iní-í cáháⁿ-í cuendá-yu, te nchòhó cuu quíndáá iní-ndó tnúhu càháⁿ-í chí Xítohó Jesucrístú chíndèe chitúu ñaha-gă xii-í. ²⁶ Te yúhú càchí-í sá sã cuendá nchaa tnúndòho tnúhu ndàhú ió ñuyíú-a vitna, te váha-gá sá ncháá ñăyiu te núu nása xíndecú-yu te ducaⁿ-ni na cùndecú-yu. ²⁷ Te nchaa cue tée ndècu ñadihí-xi te ducaⁿ-ni na cùndecu-güedé ndihí-yu, te nchaa cue tée ñá túú ñadihí-xi te ducaⁿ-ni na cùnduu-güedé vá ndúcú-güedě ñadihí-güedé. ²⁸ Dico nchaa cue tée na ndùcu ñadihí-xi te ñá díú ñⁿ cuéchi cùu-xi sá dúcáⁿ ná ndùcu-güedé ñadihí-güedé, te diu-ni ducaⁿ cùu tucu cue ñáyiu dihí te núu na nihí-yu yí-yu chí ñá díú ñⁿ cuéchi cùu-xi sá dúcáⁿ ñihí-yu yí-yu. Te núu cue tée na nihí-güedé ñadihí-güedé te nándi ndohó-yu cùndecú-yu ñuyíú-a, te núu xíáⁿ duha càháⁿ-í cuendá sá vã ndúcú-güedě ñadihí-güedé cuendá sá vã ndóhó-yu.

²⁹ Te nchaa nchòhó ñáyiu ndècu ndihí-í ichi Xítohó Jesucrístú na càchí tnúhu-í xii-ndo sã ñá túú-gă vãi nduu cumání te quixi tucu Xítohó Jesucrístú, núu xíáⁿ xíní ñùhu-xi sá ndèe vitna ngüíta nchaa cue tée ndècu ñadihí-xi cada-güedé chiúⁿ Xítohó Jesucrístú, te cada-güedé dàtná sá ñà túú ñadihí-güedé. ³⁰ Te nchaa ñáyiu ndihú iní-xi te na càda-ní-yu sá ñà túú ndihú iní-yu cadá-yu chiúⁿ Yá Ndiõxí. Te nchaa ñáyiu cùdíí ñni-xi te na càda-ní-yu sá ñà túú cùdíí ñni-yu cadá-yu chiúⁿ-gá, te nchaa ñáyiu ndècu ndihí nándi sá ndécú ndihí te na càda-ní-yu sá ñà túú ñã ndécú ndihí-yu cadá-yu

chìuⁿ-gá. ³¹ Te nchaa ñáyiu nèhe chiⁿ nchaa sá ió ñuyíú-a te na càda-ní-yu cuèndá sá ñà túú nă néhé chiúⁿ-yu cadá-yu chiúⁿ Yá Ndiöxí, chi nchaa sá ió ñuyíú-a sa ñùhu-xi ichi cuáháⁿ-xi núú ndíhí ñhnu-xi.

³² Te cuèní-í sá vă cùhúⁿ ìní-ndó năndi sá ió ñuyíú-a, te ni ñà túú tnàhí ná cani ìní-ndó cùndecu-ndo, chi nchaa cue téé ndècu ichi Xítóhó Jesucristú xĩndecu mee ío ñùhu ìní-güedé cada-güedé chìuⁿ-gá nàcuáa cudìu-güedé núú-gă.

³³ Te nchaa cue téé sa ndècu ñadìhí-xi cue téé ndècu ichi-gá ñùhu ìní-güedé nàcuáa cada-güedé cundecu-güedé ñuyíú-a cuèndá ducaⁿ cùdìu-güedé núú ñadìhí-güedé. ³⁴ Te diu-ni ducaⁿ cùu tucu cue ñáyiu dìhí chi ñà túú ìⁿ-ni cuu ñáyiu sa ndècu yì-xi ndìhí ñáyiu vátá cùndècu-gá yì-xi, chi ñáyiu ndècu ichi Xítóhó Jesucristú ñà túú ndèca téé ío ñùhu ìní-yu cadá-yu chìuⁿ-gá nàcuáa ñhíí ní ndúú-yu cundecu yìñùhú-yu núú Yá Ndiöxí, dico cue ñáyiu dìhí ndécá tée ndècu ichi-gá ío ñùhu ìní-yu nàcuáa cundecú-yu ñuyíú-a cuèndá cudìu-yu núú yì-yu.

³⁵ Te duha càháⁿ-í cuèndá cúú-xí ìⁿ sá vâha xii-ndo, te cudìu núú tnáhá-ndó, te cuu-ndo ñáyiu cada ndáá núú Xítóhó Jesucristú, te mee-ni-gă cuhuⁿ ìní-ndó. Te ñà díú să dúhá càháⁿ-í te quide yica-í sá cadá-ndó nàcuáa càháⁿ-í.

³⁶ Te núú ió dâva-ndo sàni ìní-ndó să ñà túú ndùu váha-xi sá ío cuu sacuéhé déhe yoco-ndo cùndecú-yu ña, te núú sàni ìní-ndó să vâha-gá candecá-yu téé te cada-ndo nàcuáa sàni ìní-ndó, chi ñà díú ìⁿ cuéchi cùu-xi. ³⁷ Te núú dâva-ndo ndècu déhe yoco-ndo, te vá yôo ìⁿ cada yica ñàha xii-ndo

sá cándecá-yu té. Te núu mee-ndo sàni váha iní-ndó nàcuáa cada-ndo, te núu vá dásáⁿ-ndó dēhe yoco-ndo càndeca ñaha té te quide váha-ndo sã dúcáⁿ quide-ndo. ³⁸ Te nchaa ñáyiú dásaⁿ déhe yoco-xi càndeca ñaha té te váha-ni quidé-yu, te nchaa ñáyiú ñá túú dásaⁿ déhe yoco-xi càndeca ñaha té te váha-gá tucu quidé-yu sá dúcáⁿ quidé-yu.

³⁹ Te nchaa ñáyiú ðíhí ndécú yí-xi xini ñuhu-xi sá cúndecu-ní-yu ndíhí yí-yu nini ndècu vívú-güedé chí ducaⁿ càháⁿ tnúhu sá dánèhé ñáhá xii-o nacuáa cada-o cùndecu-o, dico núu na cúú-güedé te cuu naquehéⁿ-yu ingá té candecá-yu ðicó-ni sá ðiu-ni té ndècu ichi Xítóhó Jesucristú. ⁴⁰ Te yúhú sání iní-í sá ño-gá váha cundecú-yu te núu vá nándúcú-yu ingá té candecá-yu, te duha càháⁿ-í chi Espíritú Yã Ndióxi ducaⁿ dàcahu iní ñáhá-xí xii-í cáháⁿ-í.

8

Cuendá nchaa sá nchító-ó sãñaha ñáyiú ndùu táhú nchaa sá càchí-yu cùu ndióxi

¹ Te vitna na càháⁿ-í cuendá nchaa sá nchító-ó sãñaha ñáyiú ndùu táhú nchaa sá càchí-yu cùu ndióxi te ñá ndàá chí ðicó ndaha cue tee ñuyíú-a ní cuáha nchaa xíãⁿ. Te nchoo sa cùtnuní váha iní-ó cuendá nchaa xíãⁿ, ðicó-ni sá cuendá nchaa sá cùtnuní váha iní-ó xíãⁿ quidé càhnu-o mee-o, dico núu cùu iní-ó tnàha ñáyiú-o te canu ichi-õ-yu ichi váha. ² Te núu dava-ndo sàni iní-ndó sã tũha-ndo dico cùu-ndo ñáyiú vátá cútũha-gá nàcuáa tàú-xi cunduú. ³ Te núu nchòhó cúú iní-ndó Yã Ndióxi te mee-gã cáháⁿ-gá sá cúú-ndó ñáyiú cùu cuendá-gá.

⁴ Te vitna na càchí tnúhu-í xii-ndo nàcuáa ndùu cuendá nchaa sá nchító-ó sãñaha ñáyiú ndùu táhú

nchaa sá cächí-yu cùu ndióxí te ñá ndàá chi dícó ndaha cue téé ñuyíú-a ní cuáha nchaa xíáⁿ. Te nchoo cùtnuní iní-ó sǎ ncháá sǎ cächí ñáyíu cùu ndióxí cadúha-yu ñuyíú-a ñá túú cùu-xi ndióxí, chi ìⁿdii díí-ni Yá Ndiöxí ndécú. ⁵ Te cue ñáyíu ñuyíú-a cächí-yu sá cuëi andíu te cuëi ñuyíú-a ndècu titní ndiöxí. Te ndáá sá ndëni ní cuu ndècu espíritú sá cächí ñáyíu cùu ndióxí te ñá ndàá sá ndiöxí cúú-xí, te nchaa xíáⁿ táxí tnùní ñáhá-xí xì-yu. ⁶ Te nchoo cùtnuní ndáá iní-ó sǎ ìⁿdii díí-ni Yá Ndiöxí ndécú te ñíu-gá cúú-gǎ Tǎtá-ó, te nchoo cùu-o ñáyíu cùu cuendá-gá. Te ñíu-ni mee-gǎ ní táuchíúⁿ-gǎ ní cuáha nchaa sá íó ñuyíú-a, te cùtnuní tucu iní-ó sǎ ìⁿdii díí-ni Xítóhó Jesucrístú ndécú, te Yaá-áⁿ ñí quide-gá nchaa chiúⁿ ní táhú Dütú Ndiöxí ní cadúha-gá nchaandi túhú sá íó ñuyíú. Te ñíu-ni mee Xítóhó Jesucrístú quidé ndècu-o ichi-gá vitna.

⁷ Te ñá ncháá nchòhó ñáyíu ndècu ichi Xítóhó Jesucrístú cùtnùní iní-ndó nàcuáa ndùu tnúhu càháⁿ-í. Chi sa ní cáaⁿ-ndo quide cahnu-ndo nchaa sá cächí-yu cùu ndióxí ní cùu. Te cuendá xíáⁿ nùu nàqueheⁿ-ni-ndo nchaa sá nchító-ó ndùu táhú nchaa sá cächí-yu cùu ndióxí-áⁿ xéxí-ndó, te sàni-ni iní-ndó sǎ quidé càhnu-ndo nchaa sá cächí-yu cùu ndióxí-áⁿ te ñá ndàá sá ndiöxí cúú-xí. Te núu sàni iní-ndó sǎ ñá túú vǎha caxi-ndo sǎ dúcáⁿ ndùu táhú-xi-áⁿ te xèxi-ndo te xíáⁿ ñá túú cùu vǎha iní-ndó cuendá sá dúcáⁿ quide-ndo. ⁸ Te ñá díú nchàa sá xéxí-ó quide-xi cudíu-o núú Yǎ Ndiöxí, chi ìⁿ-ni quide-xi cuéi na cǎxi-o àdi vá cǎxí-ó chi ni ìⁿ sá cǎxí-ó vǎ chíndèe ñaha-xi cudíu-o núú Yǎ Ndiöxí. Te cuëi vá cǎxí-ó dico ñá díú xíáⁿ cada sá vǎ cúdíu-o núú-gǎ. ⁹ Te cuu-ni caxi-ndo nchàa

náni nìhí-ndó. Te dìcò-ni sá càda cuendá-ndó sã ñã díú cuendá sá xéxí-ndó-ãⁿ cuíta nihnu dava ñáyiu ndècu ndihí-ndo ichi Xítóhó Jesucrìstú cadá-yu nándi sá cadã-yu nàcuáa vá cúú vãha iní Yã Ndióxi chi ñáyiu-áⁿ ñã túú cùtnuní iní-yu. ¹⁰ Te nchòhó ñáyiu xìní váha cuendá nchaa sá càchí-yu cùu ndióxí, te núu na quihíⁿ-ndó núú ndécú nchaa xiáⁿ te ngóo-ndo càxi-ndo nchaa sá ñi cutáhú-xi, te quini ñáyiu ndècu ndihí-ndo ichi Xítóhó Jesucrìstú, ñáyiu vátá cùtnuní-gá iní-xi nàcuáa ndùu cuendá nchaa sá dúcáⁿ càchí-yu cùu ndióxí-áⁿ, te cuèi sàni iní-yu sá ñã túú quide váha-ndo sã dúcáⁿ quide-ndo te cudana te cada yìcá-yu caxí-yu tnàhá-yu nchaa sá dúcáⁿ ñi nduu táhú nchaa sá càchí-yu cùu ndióxí-áⁿ te ñã ndàá sá ndióxí cúú-xí. ¹¹ Te núu ducaⁿ cùtnuní iní-ndó nàcuáa ndùu cuendá nchaa xiáⁿ te ducaⁿ quide-ndo, te sá dúcáⁿ quide-ndo-áⁿ te dàcuíta nihnu-ndo dàva-gá ñáyiu ndècu ndihí-ndo ichi Xítóhó Jesucrìstú, ñáyiu vátá cùtnuní-gá iní-xi nàcuáa ndùu cuendá nchaa xiáⁿ, te díu cuendá tnàhá ñáyiu-áⁿ ñi xíhí Xítóhó Jesucrìstú. ¹² Te sá dúcáⁿ quide-ndo-áⁿ cúú-xí ìⁿ cuéchi núú Xítóhó Jesucrìstú, chi quide-ndo nàcuáa xínu iní-yu cadá-yu ìⁿ sá sání iní-yu ñã túú vãha, núu xiáⁿ ñã túú quide váha-ndo sã cúú-xí-yu. ¹³ Te núu yúhú cùtnuní iní-í sá sã cuendá ìⁿ sá cáxi-í te ngóo ìⁿ ñáyiu ndècu ndihí-í ichi Xítóhó Jesucrìstú cadá-yu ìⁿ sá vã cúú vãha iní Yã Ndióxi, te váha-gá sá vã cáxi-gã-í xiáⁿ cuendá sá vã cadã-yu ìⁿ sá vã cúú vãha iní-gá.

Nchaa sá cúú càda cue téé ní táúchíúⁿ Xĩtohó Jesucristú cáháⁿ tnúhu-gá

¹ Te yúhú chi cuu cada-í nchaa sá sání iní-í, chi tnàhá-í ní táúchíúⁿ Xĩtohó Jesucristú cáháⁿ-í tnúhu-gá núú ñáyiú. Te yúhú ní xiní núù-í Xĩtohó Jesucristú Yaá cúú Xĩtohó-ó te nchòhó cúú-ndó ñáyiú ní sándáá iní tnúhu-gá sá càháⁿ-í te ducaⁿ chi ndècu ndìhi-í-gá. ² Te ìó dava ñáyiú ñá túú sándáá iní-yu sá Xĩtohó Jesucristú ní táúchíúⁿ-gá cáháⁿ-í tnúhu-gá, dico nchòhó chi cùtnuní ndáá iní-ndó sá díú-gá ní tendaha ñàha-gá xii-í xíca cùu-í càháⁿ-í tnúhu-gá, te ducaⁿ chi yúhú ní cáháⁿ-í tnúhu-gá núú-ndó te ní sándáá iní-ndó-gá te xĩáⁿ cùtnuní sá díú-gá ní tendaha ñàha-gá xii-í xíca cùu-í càháⁿ-í tnúhu-gá núú ñáyiú.

³ Te duha ndùu tnúhu càháⁿ-í cuendá cundedóho nchaa ñáyiú sàtnuhu ñàha xii-í. ⁴ Chi yúhú cuu-ni caxi-í nchaa núú sá cúú càxi-o na taxi ñáyiú.

⁵ Te cuu-ni cundecu ñadìhí-í te caca ndeca-í-yu nchaa núú xíca cùu-í càháⁿ-í tnúhu Yá Ndióxi dàtná quidé dàva-gá cue téé càháⁿ tnúhu-gá, ndìhi cue téé cùu ñaní Xĩtohó Jesucristú, ndìhi té Pèlú.

⁶ Te tnàhá yúhú ndìhi té Bèe cuu dañà-ndĩ chùuⁿ quide-ndí te cada-ndí dàtná xĩquide dava-gá-güedé càháⁿ-güedé tnúhu Xĩtohó Jesucristú. ⁷ Te nchoo xìní-ó sá ncháá cuè sandadú dacuítí sá ñúhú yáhu-güedé xínú cuèchi-güedé, te ñá túú dícó ducaⁿ xìnu cuechi-güedé. Te ducaⁿ sàtnahá-xi cùu tucu ñáyiú xìtu ìⁿ sá xítú chi dacuítí nìhí-yu ìⁿ sá xítũ-yu xèxí-yu, te ñá díú dícó ducaⁿ xítú-yu. Te ducaⁿ cùu tucu cue téé cùu toli chi quìhni-güedé dícú quítì xìto-güedé xìhi-güedé te ñá túú dícó ducaⁿ

xìto-güedé-di. ⁸ Te vá cání iní-ndó sǎ sà dúhá càháⁿ-í te càhu iní mée-í duha càháⁿ-í, chi tnúhu càháⁿ-í-a ñⁿ-ni quèe-xi ndihì tnúhu ní cáháⁿ ndíi Moisés. ⁹ Chi ndíi-áⁿ ñí chídó tnùní ndíi núú tütú ndíi nàcuáa ní xáhaⁿ Yǎ Ndiǒxí xii ndíi, te càchí-xi: “Vá chíhí-ndó ñunu yuhu ndicutu oré dánchezí-di triú”, duha càchí-xi núú tütú ndíi. Te ñá díú sǎ dúcáⁿ ñí cáháⁿ Yǎ Ndiǒxí te càháⁿ-gá mee-ni cuendá ndicutu-áⁿ. ¹⁰ Chi ní cáháⁿ-gá cuendá nchoo cuè ñáyiu ndècu ichi-gá, te ndáá sá díú cuendá-ó dùcaⁿ ní cáháⁿ-gá. Te nchaa cue téé xìtu chihi tatá sàni iní-güedé sá díú tàtá chíhí-güedé-áⁿ cuu sá cáxí-güedé, te ñiu-ni ducaⁿ cùu tucu cue téé xǐcani triú chi càni-güedé cuendá quee caxi-güedé. ¹¹ Te ducaⁿ sǎtnhá-xi cùu nchúhú cue téé càháⁿ tnúhu Xítóhó Jesucristú, chi dànehé ñáhá-ndí xii-ndo cuendá nchaa sá vǎha quide ñaha Yǎ Ndiǒxí xii-o, núu xǐáⁿ dai tàú-xi sá nchòhó chindee ñàha-ndo xii-ndí ñúu ná cúú sǎ xíní ñùhu-ndí. ¹² Te núu dava cue téé càháⁿ tnúhu Yǎ Ndiǒxí chindèe-ndo-güedé, te uuⁿ-gá ducaⁿ tàú-ndó chindee-ndo nchúhú cue téé ní sanu ichi ñaha xii-ndo ichi-gá.

Te cuèi tàú ndisa-ndo sǎ chindèe ñaha-ndo xii-ndí dico ñá túú dùcaⁿ caháⁿ-ndí núú-ndó càda-ndo, te quide cahnu iní-ndí cuèi nándi sá tá yǎha-ndí véxi. Te ducaⁿ quide-ndí cuendá sá ñà túú ñá cani iní ñáyiu cuendá-ndí te ducaⁿ cuíta cuténuu-gá tnúhu sá càháⁿ nàcuáa naníhí tàhú-ó quǐhíⁿ. ¹³ Te nchòhó xíní-ndó sǎ ncháá cuè téé xínu cuechi veñúhu ñiu-ni xǐáⁿ ñihí-güedé xéxí-güedé, te ñiu-ni cue téé-áⁿ xínú cuèchi-güedé núú xihí quitì ndùu táhú Yǎ Ndiǒxí, te ñiu-ni xǐáⁿ ñihí tucu-güedé

sá xéxí-güedě. 14 Te diu-ni ducaⁿ sãtnahá-xi cùu nchúhú cue tée cãháⁿ tnúhu sá cãháⁿ nãcuáa naníhí tãhú-ó, chi Xítóhó Jesucristú ní cachí-gá sá díú-ní cuendá chiúⁿ quide-ndí níhí-ndí caxi-ndí. 15 Te ñá ííⁿ ndùu cãháⁿ-í núú-ndó càda-ndo nacuáa tàú-xi cunduu sá cúú-xì-í, te vá cání ìní-ndó sã sã dúhá cãháⁿ-í te ííⁿ sá xìcãⁿ-í núú-ndó. ¡Chi cuèi na cùú-í sá ndóhò-í te ñá díú sã cãháⁿ ñáyiu sá sã cuendá sá cãháⁿ-í tnúhu Xítóhó Jesucristú níhí-í xéxì-í!

16 Te yúhú ñá túú quide cahnú-í mée-í sá cãháⁿ-í tnúhu sá cãháⁿ nãcuáa naníhí tãhú-ó, chi tàú tnãhá-í sá cáda-í chi ducaⁿ ní cachí Yã Ndiõxí cada-í. ¡Te ndãhú ní cuu yúhú te núu vá cãháⁿ-í tnúhu-áⁿ! 17 Te ñá túú cãháⁿ-í tnúhu-gá sá cúú ìní mée-í chi mee-gã ní táuchíúⁿ-gã cãháⁿ-í tnúhu-gá. Te núu cãháⁿ-í tnúhu-gá sá cúú ìní mée-í te tàú-í níhí-í sá ndúú tãhú-í ní cùu. 18 Dico sá sã ní nduu táhú-í cúú-xí sã ío cùdíí ìní-í sá dícó ducaⁿ cãháⁿ-í tnúhu sá cãháⁿ nãcuáa naníhí tãhú-ó. Te cuèi tàú-í queheⁿ-í sá táxí-ndó ndùu táhú-í sá cuendá sá cãháⁿ-í tnúhu Xítóhó Jesucristú, dico ñá túú dùcaⁿ quide-í. 19 Te sá dúcãⁿ dícó ducaⁿ cãháⁿ-í tnúhu sá cãháⁿ nãcuáa naníhí tãhú-ó, xíãⁿ ni ííⁿ ñáyiu ñuyíú-a vá cúú càchí-yu sá táxí tnùní ñáhã-yu xii-í, te cuèi ducaⁿ dico mee-í ní sani ìní-í sá cùú-í dàtná ííⁿ tée xínu cuechi núú nchãa ñáyiu cuendá ducaⁿ cuita cuu vai-yu tuhá-yu ichi Xítóhó Jesucristú quíhíⁿ. 20 Te òré ñúhú tnãhí tnuú cue ñáyiu isrãél te quide-í sá ííⁿ-ní cùu-í ndíhí-yu cuèi ñá túú nchìcúⁿ nihnu-í tnúhu ní cãháⁿ ndí Moisés, te ducaⁿ quide-í cuendá sá ñáyiu-áⁿ quindáá ìní-yu tnúhu cãháⁿ-í te tuhá-yu ichi Xítóhó Jesucristú. 21 Te òré ñúhú tnãhí tnuú nchãa ñáyiu ñá túú nchìcúⁿ nihnu tnúhu ní

cáháⁿ ndíi Moisés, te quide-ni-í sá quidè-í dàtná quidé mèé-yu cuendá quíndáá iní-yu tnúhu cáháⁿ-í, te tuhá-yu ichi Xítohó Jesucristú. Te cuèi ducaⁿ quide-í dico ñá túú dàña ndeé-í quidè-í nchaa nàcuáa cuení Yá Ndiöxí cada-o, te ducaⁿ chi nchícúⁿ nihnu-í quidè-í nchaa nàcuáa cáháⁿ Xítohó Jesucristú. ²² Te òré ndécù-í ndihi nchaa ñáyiú ñá túú cùtnuní váha iní-xi nàcuáa cundecu ichi Xítohó Jesucristú, te tnàhá-í quidè-í dàtná quidè-yu cuendá sá ná tètóho-yu nchaa tnúhu cáháⁿ-í te ducaⁿ cùtnuní-gá iní-yu nàcuáa cundecú-yu ichi-gá. Te nchaandi túhú ñáyiú quide-í sá ìⁿ-ni cuu-í ndihí-yu cuendá ducaⁿ ñihí-í nàcuáa cada-í te cundedóho-yu tnúhu cáháⁿ-í te tníⁿ-yu ichi Xítohó Jesucristú te naníhí tǎhú-yu. ²³ Te duha quide-í cuendá sá cuíta quíndáá iní-yu tnúhu sá cáháⁿ nàcuáa naníhí tǎhú-ó quǐhíⁿ, te ducaⁿ te tnàhá yúhú ío váha cundecu-í dàtná cáháⁿ tnúhu-áⁿ.

²⁴ Te nchòhó sa xìní-ndó sǎ ncháá cuè téé xínu quíhu màrcúhyú nchaa-güedé xínú-güedě, dico ìⁿ-ni-dé cúú téé ndàcu ngodó núú te téé-áⁿ cúú téé nihí sá ndúú tǎhú-xi, te ducaⁿ xini ñuhu-xi cada nchóhó tucu chi cada-ndo ncháa nàcuáa cuení Yá Ndiöxí cada-ndo cuendá ducaⁿ nihí-ndó sǎ ndúú tǎhú-ndó. ²⁵ Te nchaa cue téé xini dadìqui te váha váha quide cuendá-güedé nñu ná cúú sǎ cádá tneñu te xòcani-güedé cuendá sá ñà díú xǎⁿ cada te cuíta-güedé òré dadìqui-güedé. Te ducaⁿ quide-güedé cuendá cuení-güedé nihí-güedě sá ndúú tǎhú-güedě, te sá ndúú tǎhú-güedě-áⁿ cúú-xi ìⁿ sá ndíhí nihnu ñuyíú-a. Dico nchoo ndùcu ndee-o quide-o nàcuáa nihí-ó sǎ ndúú tǎhú-ó, te

xíãⁿ cudíi-xi cundecu ndihi-o nì caa ni quíhíⁿ. ²⁶ Te yúhú quídè-í dàtná quidé cuè téé xínu, chí cue téé-áⁿ xíní-güedé núú quéxiò-güedé, te quide tucu-í dàtná xíquide cue téé sa ní cutúha nàá, te ñá túú quide-í dàtná quidé cuè téé vitna dàcuaha naá. Te ducaⁿ chí yúhú quídè-í nchaa nàcuáa cuení Yă Ndiöxí cunduu. ²⁷ Te yúhú ñá túú dàña-í taxi tñuní ñáhá nì ïⁿ sá cuèhé sá dúhá xii-í chí yòtnii-í mée-í. Te ducaⁿ quide-í chí yúhú càháⁿ-í tñúhu Xítóhó Jesucristú núú ñáyiú, te cuení-í sá vă cuíta sá ñí cachí Yă Ndiöxí nduu táhù-í.

10

Cuëndá nchaa sá ñí cadúha cue téé ñuyúú-a quide cahnu ñáyiú

¹ Te nchòhó ñáyiú ndècu ndihi-í ichi Xítóhó Jesucristú na càchí tñúhu-í xii-ndo cuëndá nchaa ñaní tnáhá-ndí ñáyiú isràél ní xíndecu ndéé sanaha, chí vitna tnáhá nchòhó cúú-ndó dàtná cue ñaní tnáhá nchàa ñáyiú-áⁿ chí ndècu-ndo ichi-gá. Te nchaa ñáyiú-áⁿ ñí taxi ndecu Yă Ndiöxí ïⁿ vícò ñí dánèhé ñáhá-xí xii-yu ichi quíhíⁿ-yu, te ní quée dava ndute làmár nání Măř Tícuèhé te nchaá-yu ní yáha-yu. ² Te sá dúcáⁿ ñí cuu te nchaá-yu ïⁿ-ná ní cuú-yu ndihi ndíi Moisés, te ní xíhi ndaha ñàha ndíi xii-yu. ³ Te nchaá-yu ní xexí-yu sá ñí sáñaha Yă Ndiöxí xii-yu. ⁴ Te ducaⁿ nchàa tucú-yu ní xihí-yu ndute sá ñí sáñaha-gă xii-yu, ndute sá ñí quee yiqui nàha cava. Te cava-áⁿ cada iní-ó să cúú-xí dàtná Xítóhó Jesucristú te ducaⁿ chí ndihi ñàha-gă xii-yu ichi cuáháⁿ-yu dàvá-áⁿ. ⁵ Dico ío vai-yu ñá túú ní quidé-yu nàcuáa càháⁿ Yă Ndiöxí, te xiãⁿ ñá túú ní

cùu váha iní ñáhá-gă xii-yu. Te sá dúcáⁿ ñi quidé-yu núu xiáⁿ òré ñúhũ-yu ichi cuáháⁿ-yu xití yucu ío vâi-yu ní xihí.

⁶ Te ducaⁿ ñi cuu cuendá nchoo vâ cãchĩcúⁿ nihnu-o càda-o nacuáa ní quidé-yu, chi ñáyiu-áⁿ mee-ni nchaa sá cuèhé sá dúhá ñi sani iní-yu ní quidé-yu. Te nchoo xini ñuhu-xi sá vâ dúcáⁿ càda-o.

⁷ Te yúhú cãháⁿ-í dóho-ndo sã vâ quindáa iní-ndó te ni vâ cáda cãhnu-ndo ni #ⁿ sá cãchĩ-yu cùu ndióxí ní cadúha cue téé ñuyú-a dàtná ní quide cue ñaní tnáhá-ndĩ ní xíndecu ndéé sanaha. Chi ñáyiu-áⁿ ñi quidé-yu dàtná cãháⁿ-xi núu tùtú Yã Ndiõxí núu cãchĩ-xi: “Nchaa ñáyiu ní xexí-yu ní xihí-yu ní quidé-yu vico, ní quide cãhnú-yu sá cãchĩ-yu cùu ndióxí ní cadúha-yu te ñá ndàá sá ndiõxí cúú-xí”, duha cãchĩ-xi núu tùtú-gá. ⁸ Te ni vâ cúndècu-ndo ichi dǐ iní dàtná ní quide dava ñáyiu-áⁿ, chi sá dúcáⁿ ñi quidé-yu te ní xihí ócò úní mĩl-yu #ⁿ-ni ndùu. ⁹ Te vá cãní iní-ndó sã sã cãhnú iní Yã Ndiõxí te nãndi sá cuèhé sá dúhá càda-ndo cuendá cuini-ndó quini-ndó núu nása cada ñaha-gã xii-ndo, chi ñáyiu ní xíndecu ndéé sanaha-ãⁿ ducaⁿ ñi xóo cadá-yu, te ní xihí-yu ní xexihaⁿ cõó. ¹⁰ Te ni vâ cãháⁿ cuèhé-ndó cuendá Yã Ndiõxí, chi dava ñáyiu ní xíndecu ndéé sanaha-ãⁿ ducaⁿ ñi quidé-yu ní cãháⁿ cuèhé-yu cuendá-gá te ní quixi espíritu xínú cuèchi núu-gã ní sahani ñaha-xi xii-yu.

¹¹ Te ducaⁿ ñi cuu te ducaⁿ ñi ngúndeé núu tùtú Yã Ndiõxí cuendá dacuàha-o vitna ta cuyatni nduu naa ñuyú-a. Te nchaa tnúhu sá ñi ngódó tnùnĩ-áⁿ cãháⁿ dóho ñaha-xi xii-o cuendá sá vâ cáda-ó dàtná ní quide ñáyiu-áⁿ. ¹² Te xiáⁿ núu nchaa nchòhó

ñáyiú sàni iní sá ïo váha cùndáá ndécú ìchi Xítóhó Jesucristú cada cuendá-ndó sá dúcáⁿ-ní cùndáá-ndó nǔú-gǎ, te vá dáná cuendá-ndó càda-ndo sá ñà túú cùu váha iní Yǎ Ndiǒxí. ¹³ Te ñi-ⁿi dàtná quidé sàcuíhná dácàháⁿ-xi iní nchaa dava-gá ñáyiú nándi quidé-yu, te ñi-ⁿi ducaⁿ quide ñaha-xi xii-ndo. Dico mee Yǎ Ndiǒxí cúú-gǎ Yaá quidé ndáá chi quide-gá nchaa sá càháⁿ-gá, te ñá dáñá-gǎ sá sǔúni cuídó sàcuíhná coto ndeé ñáhá-xí xii-ndo, chi není-ni nàcuáa cùndee iní-ndó dàña-gá ducaⁿ quide ñaha-xi xii-ndo. Te ñi-ⁿi-gá chindee ñàha-gá xii-ndo cùndee iní-ndó vǎ cáda-ndó cuèi nándi sá ná dàcahu iní ñáhá-xí xii-ndo.

¹⁴ Te xǎⁿ nǔu càháⁿ-í dóho nchòhó ñáyiú ío cùu iní-í sá vǎ quíndáá iní-ndó nì ìⁿ sá càchí-yu cùu ndiǒxí te ñá ndàá chi dìcò ndaha cue téé ñuyíú-a ní cuáha nchaa xǎⁿ, te ni vǎ cáda càhnu-ndo. ¹⁵ Te duha càháⁿ-í chí cùu-ndo ñáyiú tècú tnùní, te mee-ndo ïo váha cuáha-ndo cuendá te núu váha-ni càháⁿ-í àdi ñá túú váha-ni. ¹⁶ Te nchoo ndàcáⁿ táhú-ó nǔú Yǎ Ndiǒxí cuendá ndudí ndéhé yoho yàha stilé sá xíhí-ó, te sá dúcáⁿ xíhí-ó ndùdí ndéhé yoho yàha stilé-áⁿ, te xǎⁿ ndácú ìní-ó sǎ ìⁿ-ní cùu-o ndihí Xítóhó Jesucristú cuendá sá ñí satí ñíñí-gǎ ní xíhí-gá núú cùrúxí, te ñi-ⁿi ducaⁿ sǎtnahá tucu-xi cùu paá sá xéxí-ó òré xíhí-ó ndùdí ndéhé yoho yàha stilé-áⁿ, chí sá dúcáⁿ xèxi-o paá-áⁿ xǎⁿ ndácú ìní-ó sǎ ìⁿ-ní cùu-o ndihí Xítóhó Jesucristú sá cuendá yiqui cùñú-gá. ¹⁷ Te cuèi vǎi vihi-o dico ìⁿdii-ni paá xéxí-ó, te sá dúcáⁿ ìⁿdii-ni paá xéxí-ó xǎⁿ ndácú ìní-ó sǎ ìⁿ-ní cùu-o ndihí Xítóhó Jesucristú.

¹⁸ Te cada cuendá-ndó nàcuáa quide ñáyiú isràél, chí ñáyiú-áⁿ xéxí-yu sá ndúú táhú Yǎ Ndiǒxí. Te sá

dúcáⁿ quidé-yu-áⁿ cútnùní iní-ó sã tnàhá tnúhu-yu ndìhi-gá. ¹⁹ Te vá cání ìní-ndó sã sà dúhá càháⁿ-í te cachí-ndó sã cùnuu nchaa sá càchí-yu cùu ndióxí ní cadúha cue tée ñuyíú-a chi ñá túú nã cúú nì ñⁿ nchaa xíáⁿ. Te ðiu-ni ducaⁿ cùu tucu nchaa sá sãñaha ñãyiu ndùu táhú-xi chi ñá túú cùnuu-xi, chi ñⁿ-ni cùu-xi ndìhi nchaa dava-gá sá xéxí-ó. ²⁰ Te yúhú càchí-í sá sã dúcáⁿ quíde nchaa ñãyiu ñá túú tnàhá tnúhu ndìhi Yá Ndióxí, te ðicó nchaa espíritú cùndìhi yucu ñávãha sãñàhá-yu sá ndúú táhú-xi sá dúcáⁿ quidé-yu. Te ñá díú Yã Ndióxí sãñàhá-yu sá ndúú táhú-gã. Te yúhú cuìní-í sá vã tnàhá tnúhu-ndo ndìhi cue espíritú cùndìhi yucu ñávãha. ²¹ Te ducaⁿ chi vá cúú tnàhá tnúhu-o ndìhi cue espíritú cùndìhi yucu ñávãha te tnahá tnúhu-o ndìhi Xítohó Jesucrístú, te ñá túú ndùu váha-xi ngóo càxi-o coho-o sá ndúú táhú cue espíritú cùndìhi yucu ñávãha-áⁿ, te ngóo càda-o nacúáa ní dándõo tnúhu Xítohó Jesucrístú coho-o ndùdí ndéhé yoho yàha stilé, te caxi-o pàá cada-o sã ndácú ìní-ó sã ñí xíhí-gá núú cùrúxí. ²² Te vá cání ìní-ó dùcaⁿ cada-o cuendá sá vã cúdééⁿ Yã Ndióxí, chi ñá túú nã càhnu cuu-o núu cada-o ñãni véxi iní mée-ó, chi mee-gã ío càhnu cuu-gá.

Cada-o nchàa nacúáa cuu càhnu Yá Ndióxí

²³ Te ndáá sá ncháá sã cuìní-ó càda-o te cuu cada-o ðico ñá ncháá cùu-xi sá vãha sá cúú-xí-ó, te ni ñã ncháá-xí chìndee ñaha-xi nacúáa ñíhí ndéé-gã-ó cùndecu-o ichi Xítohó Jesucrístú. ²⁴ Te xìni ñuhu-xi sá cádá-ó sã vãha sá cúú-xí tnàha ñãyiu-o te ñá díú mèe-ni sá cúú-xí mèe-o cada-o.

²⁵ Te nchòhó cuu caxi-ndo nchàa cuñú sá cùyăhu cuñú sá xìní caxi-ndo, te vá ndúcú tn̄hu-ndo te núu cùu-xi cuñú sá nĩ nduu táhú sã cächí-yu cùu ndiòxí. Te ñá túú nã cani iní-ndó caxi-ndo, ²⁶ chi ñuyíú-a ndihi nchaa sá ió cúú-xí cuendá Yă Ndiòxí.

²⁷ Te núu ìⁿ ñáyiu ñá túú ndècu ichi Xítóhó Jesucrístú cãháⁿ ñáhă-yu xii-ndo quĩhíⁿ-ndó caxi-ndo dítá vehé-yu, te núu sàni iní-ndó sã quĩhíⁿ-ndó te cuu quĩhíⁿ-ndó te caxi-ndo cuèi nái cùu sá táxí-yu dïco vá cãcáⁿ tn̄hú-ndó nũ-yu núu ndéé ní nĩhí-yu, te ducaⁿ te cuu váha iní-ndó caxi-ndo. ²⁸ Te núu ìⁿ ñáyiu cächí-yu sá xĩăⁿ cúú-xí sã nĩ nduu táhú sã cächí-yu cùu ndiòxí te vá caxí-ndó cuendá sá ñáyiu ducaⁿ cãháⁿ-áⁿ cuu váha iní-yu te ñá túú tn̄hí ná cani iní-yu. ²⁹ Te yúhú cãháⁿ-í cuendá nàcuáa sàni iní méé ñáyiu ducaⁿ cãháⁿ-áⁿ te ñá díú sã nàcuáa sàni iní méé-ndó quide-ndo.

Te dava-ndo cächí-ndó: “Cuu-ni cada-o nchàa nacuáa sàni iní méé-ó cuèi dava-gá ñáyiu sàni iní-yu sá ñà túú ndùu váha-xi sá dúcáⁿ càda-o”, duha cächí-ndó. ³⁰ Te cächí tucu-ndo: “Ñá túú tàú-xi cãháⁿ cuèhé ñáyiu cuendá-ó sã cuendá nchaa sá xéxí-ó chi ndàcáⁿ táhú-ó nũú Yă Ndiòxí òré xéxí-ó”, duha cächí-ndó. ³¹ Te cuèi nãndi sá xìní caxi-ndo nihí-ndó xèxi-ndo àdi quide-ndo, te cada-ndo nàcuáa cãháⁿ váha ñáyiu cuendá Yă Ndiòxí. ³² Te vá cãdá-ndó sã ñà túú tàú-ndó càda-ndo cuendá sá vá cãdá ñáyiu ìⁿ sá ñà túú cùu váha iní Yă Ndiòxí. Te ni sã cúú-xí cuè ñáyiu isràél, te ni sã cúú-xí cuè ñáyiu ñá túú cùu ñáyiu isràél, te ni sã cúú-xí cuè ñáyiu ndècu ichi-gá vá dúcáⁿ càda-ndo sá cúú-xí-yu. ³³ Te yúhú ío ndùcu ndee-í

quidè-í nàcuáa cudìu-í núú nchàa ñáiyu, te quidè-í sá vâha sá cúú-xĩ-yu, te ñá túú quidè-í mee-ni sã cúú-xí mée-í. Te ducaⁿ quidè-í cuendá quíndáá iní-yu tnúhu Xítohó Jesucristú te naníhí tàhú-yu.

11

¹ Te chí cánc'hìcúⁿ nihnu cada-ndo nchàa nacuáa quidè-í nchìcúⁿ nihnu-í nchaa nàcuáa quidè Xítohó Jesucristú.

Nàcuáa tàú-xi cada nchaa ñáiyu dìhí núú tàcá-yu dàcuahá-yu tnúhu Yá Ndiõxí

² Te nchòhó ñáiyu ndècu ndihí-í ichi Xítohó Jesucristú càchí tnúhu-í xii-ndo sã ïo cùdí iní-í, chí ndàcu iní ñáhá-ndó xii-í, te quidè-ndo nchaa nacuáa ní dánèhé ñáhà-í xii-ndo. ³ Te cuiní-í sá nchòhó cutnùní iní-ndó sã ñⁿdii-ni Yá Ndiõxí cúú-gã Yaá cúnùu taxi tnuní ñáhá xii Xítohó Jesucristú, te ducaⁿ Xítohó Jesucristú ñⁿdii-ni-gá cúnùu taxi tnuní-gá nchaa cue téé, te nchaa cue téé ñⁿni mee-güedé cúnùu-güedé táxí tnùní-güedé ñadìhí-güedé. ⁴ Te núu nchoo cuè téé na dàdàhu-o díquí-ó òré càháⁿ-ó núú ñáiyu tnúhu sá dácàhu iní ñáhá Yá Ndiõxí xii-o àdi oré càháⁿ ndihí-o-gã, te ñⁿ sácáⁿnúú cúú-xí te núu ducaⁿ na càda-o dadáhu-o díquí-ó. ⁵ Dico núu ñáiyu dìhí vá dadáhu-yu díquí-yu òré càháⁿ ndihí-yu Yá Ndiõxí, àdi oré càháⁿ-yu tnúhu sá dácàhu iní ñáhá-gã xií-yu núú tnáhá ñáiyú-yu, te sácáⁿnúú cúú-xí te núu vá dadáhu-yu díquí-yu, chí ñⁿ-ni cùu-xi te núu na dèté ndíí-yu díquí-yu. ⁶ Te núu ñá túú cuiní cue ñáiyu dìhí dàdàhu-yu díquí-yu te váha-gá sá ná dèté

ndí-yu díquí-yu. Te núu cùcahaⁿ núŷ-yu sá dèté díquí-yu te váha-gá sá ná dàdáhu-yu díquí-yu. ⁷ Te nchoo cuè téé vá cúú dàdáhu-o díquí-ó òré càháⁿ ndíhi-o Yá Ndiöxí ní òré càháⁿ-ó tnŷhu sá dácàhu iní ñáhá-gã xii-o núú ñáyiú chi díhna-gá-ó ní cadúha ñaha Yá Ndiöxí xii-o, te ní taxi ndecu-gá nchaa sá xini tnùnì-ó dàtná ndécú nchàa sá xini tnùnì mée-gã. Te ducaⁿ ní quide-gá chi cuini-gá sá nchóó càda-o nacuaá cáháⁿ nchaa dava-gá ñáyiú sá ïo càhnu cuu-gá, te cue ñáyiú dìhí quidě-yu nàcuáa cunuu nchòo cue téé. ⁸ Te Yá Ndiöxí ní cadúha-gá téé, dico ñá díú yìqui naha ñadìhí ní quenehe-gá ní cadúha-gá téé chi yìqui naha téé ní quenehe-gá ní cadúha-gá ñadìhí. ⁹ Te sá cuendá téé ducaⁿ ní cadúha-gá ñadìhí-áⁿ te ñá díú sã cuendá ñadìhí ní cadúha-gá téé. ¹⁰ Núu xiãⁿ tàú-xi sá ncháá ñáyiú dìhí dàdáhu-yu díquí-yu cuendá ducaⁿ cùtnuní sá ñà túú cùnuú-yu dàtná cùnù nchoo cue téé. Te ducaⁿ xini ñuhu-xi cadá-yu sá cuendá nchaa espíritú xínú cuèchi núú Yá Ndiöxí. ¹¹ Te vitna nchoo ñáyiú ndècu ichi Xítóhó Jesucrístú, vá càchí-ó sã cuè téé ñá túú xini ñuhu-güedé cue ñáyiú dìhí chindee ñáhá-yu, te ní vã càchí-ó sã cuè ñáyiú dìhí ñá túú xini ñuhú-yu cue téé chindee ñàha-güedé xii-yu. ¹² Te ìⁿ yìqui naha téé ní queñuhu Yá Ndiöxí ní cadúha-gá ñadìhí, dico vitna chi ñáyiú dìhí dácàcú-yu téé. Te téé, ñadìhí ní cadúha Yá Ndiöxí, te ñu-ni ducaⁿ ní cadúha-gá nchaa dava-gá sá ïó.

¹³ Te mee-ndo càda cuendá-ndó te núu ndùu váha-xi sá vã dádàhu cue ñáyiú dìhí díquí-yu òré càháⁿ ndíhí-yu Yá Ndiöxí àdi ñáhá. ¹⁴ Te nchaa

ñáyiú càháⁿ-yu sá ñà túú ndùu váha-xi sá cuè téé cunduu nàni idi díquí-güedě, chi ìⁿ sácáⁿnũú cúú-xí càchí-yu. ¹⁵ Te nchaa ñáyiú ðíhí ñáyiú nàni idi díquí-xi càchí ñáyiú sá ìⁿ sá vǎha cùu-xi sá cúú-xǐ-yu sá dúcáⁿ nàni idi díquí-yu. Te ducaⁿ chi Yá Ndióxi ní cachí-gá sá dúcáⁿ cùnduú-yu cuendá quidáhu-xi díquí-yu. ¹⁶ Te núu ìò ñáyiú cuení dacáá cuendú cuendá sá ñǎ cáháⁿ-í-a, te na cùnahá-yu sá ncháá nchũhú cue téé càháⁿ tnúhu Xítóhó Jesucristú ðiu-ni ducaⁿ sàni iní-ndí cada nchaa ñáyiú ðíhí. Te ðiu-ni ducaⁿ sàni iní nchaa ñáyiú ndècu ichi-gá.

Cuendá ñáyiú ñá túú quide datná ní quide Xítóhó Jesucristú cútnàhá ní cudìni-gá ndìhi cue téé ní xica cuu ndìhi-gá

¹⁷ Te nchòhó ñá túú quide váha-ndo ndècu-ndo núu xǎⁿ duha na càháⁿ-í dóho-ndo, chi nchòhó òré tàcá-ndó ñá túú quide váha-ndo chi ñá túú chindee tnaha-ndo cada-ndo sá vǎha, chi da nàdatuhú iní tnáhá-ndó nàcuáa ndècu-ndo. ¹⁸ Te díhna-gá na càchí tnúhu-í xii-ndo sǎ ñìhí-í tnúhu sá òré tàcá-ndó quide-ndo nacuáa ní cáháⁿ Xítóhó Jesucristú, te ñá túú cùu ìⁿnuu-ndo oré ducaⁿ quide-ndo nacuáa ní cáháⁿ-gá. Te dava sá càháⁿ ñáyiú sàndáá iní-í te dava ñáhá. ¹⁹ Te ndáá sá dúcáⁿ tnàhí cada-xi yá cúú ìⁿnuu-ndo cuendá ducaⁿ cùtnuní núu ndédacáa-ndo sandáá ndisa iní-ndó tnúhu Xítóhó Jesucristú te ndédacáa-ndo ñáhá! ²⁰ Te ndì tnahá òré tàcá-ndó quide-ndo datná ní quide Xítóhó Jesucristú cútnàhá ní cudìni-gá ndìhi cue téé ní xica cuu ndìhi-gá, te ñá túú quide-ndo nacuáa tàú-xi cunduu chi cùtexínu-ni quide-ndo.

21 Chi òré tàcá-ndó quède-ndo nacuaáa ní cachí Xítóhó Jesucrìstú, te dava-ndo ngödó núú-ndó dǐhna-gá-ndó xèxi-ndo sá néhé-ndó te ñá túú sǎ cùndètu tñaha-ndo, te ñá túú càháⁿ tñáhá-ndó nǔu xǎⁿ dava-ndo ñà túú xèxi-ndo ndahá xití-ndó, te dava-ndo xidó-ndó quède-ndo chi xǎni-ndo. ²² Te vá dúcáⁿ càda-ndo chi càa vehe-ndo núú dúcáⁿ càxi-ndo coho-ndo cada-ndo ndéé ndahá xití-ndó, chi sá dúcáⁿ quède-ndo te dàquee tǐhú-ndó nchàa dava-gá ñáyiu ndècu ndǐhi-ndo ichi Yá Ndiöxí, te dàndóo canúú-ndó nchàa ñáyiu ndàhú sá dúcáⁿ quède-ndo. ¡Núu xǎⁿ vá cúú càchí-í sá cúú-ndó ñáyiu quède váha chi ñá túú quède váha-ndo sǎ dúcáⁿ quède-ndo ndecu-ndo!

Xítóhó Jesucrìstú ní dándöo tñuhu-gá sá cóhó-ó ndùdí ndéhé yoho yàha stilé te caxi-o pàa cuendá ndacu iní-ó sǎ ñǐ xǐhí-gá

(Mt. 26:26-29; Mr. 14:22-25; Lc. 22:14-20)

²³ Te dàtná-ni ní dánèhé ñáhá Xítóhó Jesucrìstú xii-í te ñu-ni ducaⁿ ñǐ dánèhé ñáhà-í xii-ndo, chi ñu-ni niú cútnàhá ní sáha cuendá ñáhá ndǐi Jùdás Iscàrioté xii-gá núú cuè téé cùu úhú iní ñáhá ñǐ queheⁿ-gá pàá, ²⁴ te ní ndacáⁿ táhú-gǎ núú Yǎ Ndiöxí, te ní táhú cuèchi-gá, te ní xáhaⁿ-gǎ xii cue téé xǐca cuu ndǐhi-gá: “Chí quéhéⁿ pàá-a caxi-ndo te cada iní-ndó sǎ cúú-xí dàtná yǐqui cùñú-í, chi yúhú cuú-í sácuendá-ndó. Te ducaⁿ-ni càda-ndo cundecu-ndo cuendá ndacu iní ñáhá-ndó xii-í”, càchí-gá xǎhaⁿ-gǎ xii-güedé. ²⁵ Te sátá ñǐ yàha ní xexi-güedé pàá sá ñǐ sǎñaha-gǎ, te ní queheⁿ-gá tàsáⁿ ñúhú ndùdí ndéhé yoho yàha stilé, te ní ndacáⁿ táhú tùcu-gá núú Yǎ Ndiöxí. Te ní xáhaⁿ-gǎ

xii cue tée xica cuu ndihi-gá: “Chí cóhó ndùdí ndéhé yoho yàha stilé-a, te cada iní-ndó sã cúú-xí dàtná níñi-í, te cuendá níñi-í sá cáti òré cuú-í cutnùní ndáá sá Yã Ndiõxí cada-gá ingá núú sã vãha sá cúú-xí ñãyiu. Te ndi tnahá òré coho-ndo ndùdí ndéhé yoho yàha stilé-án te ndacu iní ñáhá-ndó xii-í, te ducaⁿ-ni càda-ndo cundecu-ndo”, cachí-gá xãhaⁿ-gã xii-güedé. ²⁶ Te ndi tnahá òré xéxí-ndó pàá te xihí-ndo ndudí ndéhé yoho yàha stilé, te xiãⁿ dátüu-ndo núú ñãyiu sá Xítóhó Jesucrìstú ní xihí-gá cuendá-yu, te ducaⁿ-ni càda-ndo cundecu-ndo ndéé ná sàá nduu quixi tucu Xítóhó Jesucrìstú.

Nàcuáa cada-o òré caxi-o pàá ndihi òré coho-o ndùdí ndéhé yoho yàha stilé dàtná ní cachí Xítóhó Jesucrìstú

²⁷ Te dava-ndo ñà túú quide-ndo nacuéa cuèni Yã Ndiõxí cada-ndo òré xéxí-ndó pàá ndihi òré xihí-ndó ndudí ndéhé yoho yàha stilé, te sá dúcáⁿ quide-ndo-án te cucuéchi xii-ndo chi ñã túú nèhe-ndo sá yíñùhu sá cúú-xí yiqui cuñú Xítóhó Jesucrìstú, te ni ñà túú nèhe-ndo sá yíñùhu sá cúú-xí níñi-gã. ²⁸ Te ío váha cada cuendá-ndó te núu ndècu váha iní-ndó núú Xítóhó Jesucrìstú òré cúmãní-gã caxi-ndo pàá ndihi òré cúmãní-gã coho-ndo ndùdí ndéhé yoho yàha stilé. Te núu ndècu váha iní-ndó núú-gã te caxi-ndo te coho-ndo. ²⁹ Te dava nchòhó ñã túú sàni váha iní-ndó cuendá yiqui cuñú Xítóhó Jesucrìstú te xèxi-ndo paá te xihí-ndo ndudí ndéhé yoho yàha stilé, te nacháhu-ndo sã dúcáⁿ ñà túú sàni váha iní-ndó. ³⁰ Te diu sá dúcáⁿ quide-ndo núu xiãⁿ

vài-ndo cuhú, te ío ndàhú ndécú-ndó, te dava ñáyiú ndècu ndìhi-ndo sa ní xihí-yu. ³¹ Dico núu ío váha sáha-o cuèndá nàcuáa ndècu-o núu Yă Ndiöxí, te vá dúcáⁿ dândoho ñaha-gá xii-o. ³² Te òré ndéhé Yă Ndiöxí sá ñà túú quide ndáá-ó ndècu-o te dândoho ñaha-gá xii-o. Te ducaⁿ quide-gá cuèndá sá vǎ cuíta nihnu-o, chí núu ñáhá te cuíta nihnu-o ndìhi nchaa ñáyiú ndècu ichi cuehé ichi duha.

³³ Te núu xiǎⁿ càháⁿ-í dóho nchaa nchòhó ñáyiú ndècu ndìhi-í ichi Xítóhó Jesucristú sá òré tacá-ndó càda-ndo nacuéa ní quide Xítóhó Jesucristú cútñàhá ní cudini-gá ndìhi cue téé ní xica cuu ndìhi-gá, te cundetú tñaha-ndo nduu nchaa-ndo te dǎtnùní ducaⁿ càda-ndo. ³⁴ Te núu dava-ndo xihí-ndó dòcó te caxi duuⁿ-ndo vèhe-ndo te dǎtnùní nataká-ndó, cuèndá òré nataká-ndó te vá cádá-ndó ìⁿ sá ñà túú tàú-ndó càda-ndo cuendá sá vǎ dándoho ñaha Yá Ndiöxí xii-ndo. Te òré quixi coto ñaha-í xii-ndo te dàvá-áⁿ cachí tnúhu-í xii-ndo nchaa dava-gá sá cúmǎní.

12

Nàcuáa chindee ñaha Espíritú Yă Ndiöxí cada-o ìⁿ ìⁿ-o

¹ Te nchòhó ñáyiú ndècu ndìhi-í ichi Xítóhó Jesucristú cuíní-í cachí tnúhu-í xii-ndo nàcuáa chindee ñaha Espíritú Yă Ndiöxí xii-o ìⁿ ìⁿ-o cuendá cutnùní iní-ndó.

² Te nchòhó sa nàha-ndo sá cútñàhá vátá cùndècu-gá-ndó ichi Xítóhó Jesucristú ní xóo dandàhú ñáhá yùcu ñávǎha xii-ndo, te ní xóo quíndáá iní-ndó nchaa sá ñí cadúha cue ñáyiú ñuyúú-a nchaa sá càchí-yu cùu ndióxí te ñá ndáá sá ndiöxí cúú-xí, te nchaa xiǎⁿ ñá túú càháⁿ-xi.

³ Te cuiní-í sá nchòhó cutnùní iní-ndó sã Espíritú Yã Ndiõxí ñá túú chìndee-xi ni ìⁿ ñáyiu cuendá sá cãháⁿ úhú-yu Xítóhó Jesucrìstú. Te ni ìⁿ ñáyiu ñá túú càhu iní-yu cáháⁿ-yu sá Xítóhó Jesucrìstú cúú-gã Xítóhó-yu te núu ñá túú Espíritú Yã Ndiõxí dácàhu iní ñáhá-xí xì-yu.

⁴ Te ndi dǐíⁿ ndì dǐíⁿ ndùu chiuⁿ ní cachí Espíritú Yã Ndiõxí cada-o, te diu-ni ìⁿdìi-ni Espíritú-gá ndécú. ⁵ Te ndi dǐíⁿ ndùu chiuⁿ quide-o xinu cuechi-o núú ìⁿdìi-ni Xítóhó Jesucrìstú. ⁶ Te ndi dǐíⁿ ndì dǐíⁿ chìndee ñaha Yã Ndiõxí xii-o nàcuáa cada-o chùⁿ-gá, te diu-ni ìⁿ dìi-gá ndécú chìndee-gá nchaa ñáyiu. ⁷ Te Espíritú Yã Ndiõxí quidé-xí sã nchóó càda-o sá vãha, te ducaⁿ chìndee-o cue ñáyiu ndècu ndìhì-o ichi Xítóhó Jesucrìstú. ⁸ Te dava-o ñi nduu táhú-ó nǔú Yã Ndiõxí sá Espíritú-gá cada te ndacu-o cãháⁿ-ó tñǔhu sá ìo càhnu cuu diu-ni tñúhu mee Yã Ndiõxí, te dava tucu-o ñi nduu táhú-ó cùtnuní iní-ó nàcuáa cãháⁿ tñúhu-gá te cãháⁿ-ó nàcuáa cuiní Espíritú-gá. ⁹ Te dava tucu-o ñi nduu táhú-ó sã ìo quíndáá iní-ó Xítóhó Jesucrìstú cuendá cada-gá ìⁿ sá cuiní-ó, te ducaⁿ chi Espíritú Yã Ndiõxí chíndèe ñaha-xi xii-o. Te dava tucu-o ñi nduu táhú-ó sã càcáⁿ táhú-ní-ó nǔú Xítóhó Jesucrìstú cuendá ñáyiu cùhú te ndúha-yu. ¹⁰ Te dava tucu-o ñi nduu táhú-ó sã ndácú-ó càda-o nchaa sá vã yõo tñáhí ndàcu cada, te dava tucu-o ñi nduu táhú-ó nǔú Yã Ndiõxí sá cãháⁿ-ó tñǔhu sá dácàhu iní ñáhá-gã xii-o, te dava tucu-o ñi nduu táhú-ó sã cùtnuní iní-ó nǔu diu Espíritú Yã Ndiõxí chíndèe ñaha-xi xii ñáyiu òré cãháⁿ-yu tñúhu-gá àdi cue espíritú cúndìhì yucu ñávãha. Te dava tucu-o ñi nduu táhú-ó cãháⁿ-ó tñǔhu sá dácàhu iní ñáhá

Espíritú Yă Ndiöxí xii-o tnũhu sá ñà túú xìní-ó, te dava tucu-o ñ nduu táhú-ó cǎháⁿ-ó nàcuáa quèe-xi nchaa tnũhu-áⁿ. ¹¹ Te ìⁿdì díí-ni Espíritú Yă Ndiöxí ducaⁿ chindee ñaha-xi, te ðiu-ni Espíritú-gá dácǎhñu ñaha-xi xì-o ndi dííⁿ nũú chiuⁿ sá cuení méé-xí càda-o.

Nchaa-o ìⁿ-ni cuu-o ndihì Xítóhó Jesucristú

¹² Te nchoo ñǎyiu ndècu ñuyíú-a titní xichi cùu yiqui cuñú-ó dico ìⁿ-ni cùu-xi, te ðiu-ni ducaⁿ sǎtnahá-xi cùu-o vitna ndecu-o ichi Xítóhó Jesucristú chi ìⁿ-ni cùu-o ndihì-gá. ¹³ Te dava-o cùu-o ñǎyiu isràél, te dava-o ñà túú cùu-o ñáyiu isràél, te dava-o cùu-o ñáyiu ñá túú tnàhí dàñá quee núú chíúⁿ pàtróóⁿ-xi, te dava-o cùu-o ñáyiu dàñá quée nũú chíúⁿ pàtróóⁿ-xi. Te mee Espíritú Yă Ndiöxí ní quide-xi sá ncháá-ó ìⁿ-ná cúú-ó ndècu-o ndihì Xítóhó Jesucristú. Te Yă Ndiöxí ní cachí-gá sá ncháá-ó cùndecu ndihì-o Espíritú-gá.

¹⁴ Te nchòhó xìní-ndó sǎ tìtní xichi cùu yiqui cuñú-ó te ñá díú ìⁿ-ni xichi cuu-xi. ¹⁵ Te cuèi sáhá-ó ndihì ndaha-o ñá túú ìⁿ-ni cuu-xi dico vá cúú càchí-ó sǎ sáhá-ó ñà túú cùu-xi yiqui cuñú-ó. ¹⁶ Te cuèi lóho-o ndihì tìnuu-o ñá túú ìⁿ-ni cuu-xi dico vá càchí-ó sǎ lóho-o ñà túú cùu-xi yiqui cuñú-ó. ¹⁷ Te núu ñihì ní ndúú yiqui cuñú-ó ní xĩndéé mee-ni tìnuu-o, te ñá túú ndèé cundéé lóho-o cùndedóho ni cùu te núu ducaⁿ, àdi núu ñihì yiqui cuñú-ó ní xĩndéé mee-ni lóho-o te ñá túú ndèé cundéé dítní-ó ní cùu te núu ducaⁿ. ¹⁸ Dico mee Yă Ndiöxí ní taxi ndecu-gá ìⁿ ìⁿ xichi yiqui cuñú-ó nàcuáa ní cachí iní méé-gǎ. ¹⁹ Te núu ìⁿ-ni sǎ ní xĩndecu ñihì yiqui cuñú-ó, te vá cúndùu-xi nacuáa tàú-xi

cunduu ni cùu te núu ducaⁿ. ²⁰ Dico títⁿí xichi cùu yiqui cuñú-ó, te ìⁿ-ni cùu-xi nihíí-xi.

²¹ Te sa nàha-o sá vǎ cúú cǎchí-ó sǎ tǐnuu-o ñá túú xìni ñuhu-xi ndaha-o, àdi díquí-ó ñà túú xìni ñuhu-xi sáhá-ó. ²² Te nchoo sà naha-o sá dává xìchi yiqui cuñú-ó sǎ cǎchí-ó sǎ ñà túú cùnuu ío-gá xíní ñuhu-xi. ²³ Te dava xichi yiqui cùñú-ó sǎ ñà túú quide cuendá cávíhí-ó nchàa xǎⁿ sá quidáhu dóó sácuìhnu-o, te dava xichi yiqui cùñú-ó ñà cúú cùtúu chi dacuítíí sǎ quidáhu. ²⁴ Te nchaa xichi yiqui cùñú-ó sǎ cúú cùtúu ñá túú xìni ñuhu-xi quidáhu. Te Yá Ndiǒxí ní taxi ndecu-gá nchaa xichi yiqui cùñú-ó nàcuáa tàú-xi cunduu. Te ní cachí-gá sá dává-gǎ xichi yiqui cùñú-ó núú vǎ cúú cùtúu quidáhu. ²⁵ Te ducaⁿ ní quide-gá cuendá sá ííⁿ-ní cùu yiqui cuñú-ó. Te ducaⁿ ndì tnahá ìⁿ ìⁿ xichi yiqui cùñú-ó chindee tnahá-xi. Te ducaⁿ sǎtnahá-xi cùu nchoo vitna ndecu-o ichi Xítóhó Jesucristú chi chindee tnahá-o. ²⁶ Te núu ìⁿ xichi yiqui cùñú-ó ná tnàhúhú te nihíí-ó quide úhú-xi, te núu ìⁿ xichi yiqui cùñú-ó ìo váha ndècu-xi te ducaⁿ nihíí yiqui cùñú-ó cúú vǎha-xi. Te ducaⁿ sǎtnahá-xi cùu-o vitna ndecu-o ichi Xítóhó Jesucristú.

²⁷ Te nchoo ndècu ndìhí-o Xítóhó Jesucristú, te cùu-o datná yiqui cùñú-gá te ìⁿ ìⁿ-o cùu-o datná ìⁿ ìⁿ xichi yiqui cùñú-gá. ²⁸ Te ducaⁿ sǎtnahá-xi cùu-o chi Yá Ndiǒxí ní taxi-gá ndí dííⁿ ndì dííⁿ chùuⁿ quide-o sá cúú-xí nchàa ñáyíu ndècu ichi-gá. Te díhna-gá cue tée caca cuu cáháⁿ tnúhu-gá núú ñáyíu ní taxi ndecu-gá, te dǎtnùní ní taxi ndecu-gá cue tée cáháⁿ tnúhu-gá nàcuáa dàcahu iní ñáhá mèe-gá, te dǎtnùní ní taxi ndecu-gá cue tée dǎnehé ñáhá

xii ñáyiú tnúhu-gá núú tàcá-yu, te dătnùní ní taxi ndecu tucu-gá cue téé ndàcu quide sá vă yôo tnàhí ndàcu cada. Te ní taxi ndecu tucu-gá cue téé xicáⁿ táhú-ní núú Xĩtohó Jesucristú cuendá ñáyiú cùhú te ndúha-yu. Te ní taxi ndecu tucu-gá cue téé chindee cue ñáyiú ndècu ichi-gá. Te ní taxi ndecu tucu-gá cue téé yindaha ñaha xii ñáyiú ndècu ichi-gá, te ní taxi ndecu tucu-gá cue téé cãháⁿ tnúhu sá dácàhu iní ñáhá Espíritú-gá tnúhu sá ñà túú xìní-güedé.

²⁹ Te ñá ncháá-ó cùu-o cue téé ní táuchíúⁿ Xĩtohó Jesucristú cáháⁿ tnúhu-gá núú ñáyiú, te ñá ncháá-ó cùu-o cue téé cãháⁿ tnúhu sá dácàhu iní ñáhá Yă Ndiôxí xii-o. Te ñá ncháá-ó cùu-o cue téé dăcuaha ñaha xii-yu. Te ñá ncháá-ó cùu-o cue téé quide sá vă yôo tnàhí ndàcu cada. ³⁰ Te ñá ncháá-ó cùu-o cue téé dicó-ni cácáⁿ táhú núú Xĩtohó Jesucristú cuendá ñáyiú cùhú te ndúha-yu. Te ñá ncháá-ó cùu-o cue téé cãháⁿ tnúhu sá dácàhu iní ñaha Espíritú Yă Ndiôxí tnúhu sá ñà túú xìní-ó, te ñá ncháá-ó cùu-o cue téé cùtnuní iní-xi cáháⁿ năcuáa ndùu tnúhu-áⁿ.

³¹ Te ío nducu ndèe-ndo cada-ndo năcuáa nduu táhú-ndó núú Yă Ndiôxí nchaa sá ío-gá cúnùu cada-ndo. Te vitna na dănehé ñáhá tùcu-í xii-ndo năcuáa cada-ndo, dico sá dănehé ñáhà-í-a ío-gá cúnùu-xi.

13

Cuu iní-ó tnàha ñáyiú-o

¹ Te núu nchoo xìní-ó cãháⁿ-ó tnúhu sá ío vii ío váha cuáháⁿ cãháⁿ ñáyiú ñuyíú-a, àdi xìní-ó cãháⁿ-ó tnúhu sá ío vii ío váha cuáháⁿ cãháⁿ cue espíritú xínú cuèchi núú Yă Ndiôxí, te núu xìní-ó cãháⁿ-ó nchàa tnúhu-áⁿ te ñá túú cùu iní-ó cuè tnaha ñáyiú-o ña, te ñá túú nândíhi-xi sá xìní-ó cãháⁿ-ó

tnũhu-án te cùu-o datná dava caá sá ïo dusaⁿ quìde. ² Te núu cùu-o ñáyiú càháⁿ tnúhu sá dácàhu iní ñáhá Yă Ndiõxí, àdi cuu-o ñáyiú cùtnuní iní-xi nàcuáa cuáháⁿ nchaa tnúhu ndùu yuhu ni cuu, àdi cuu-o ñáyiú ío váha cùtnuní iní-xi nchaa nàcuáa quìde Yá Ndiõxí, àdi cuu-o ñáyiú ío váha sàndáá iní ñáhá xìi Yá Ndiõxí nàcuáa ndacu-o cùu-o ìⁿ yucu xocuiñí-xi núú ndécú-xí, te núu nchaa xíãⁿ xìní-ó càda-o te ñá túú cùu iní-ó cuè tnaha ñáyiú-o ña, te ñá túú vèdana nàndíhi-xi te núu vá cúú ìní-ó tnàha ñáyiú-o cuèi na càda-o nchaa xíãⁿ. ³ Te cuèi nchaa sá ndécú ndíhi-o na dacáhñu-o, te cuèi na cuáha cuèndá-ó mée-o cáyú-ó sá cúú-xí Yă Ndiõxí, dico ñá túú vèdana chìndee ñaha-xi xii-o sá dúcáⁿ càda-o te núu ñá túú cùu iní-ó cuè tnaha ñáyiú-o.

⁴ Dico núu cùu iní-ó cuè tnaha ñáyiú-o, te càhnu iní-ó, te quìde váha-o, te ñá túú cùu-o ñáyiú cuédú iní, te ni ñà túú càháⁿ-ó nũu cùu cahnu-o, te ni ñà túú sàni iní-ó càda cahnu-o mee-o, ⁵ te ni ñà túú ñũhu cuehé iní-ó, te ni ñà túú ndùcu-o mee-ni sá cúú-xí mée-o, te ni ñà túú-gă cúdèéⁿ-ó cuèndá ìⁿ sá cúú, te ni ñà túú-gă sácũhuⁿ iní-ó sã quídé ñàha tnaha ñáyiú-o xìi-o. ⁶ Te ni ñà túú-gă cúdĩ iní-ó nchaa sá ñà túú vãha quìde ñáyiú, chi mee-nã cuèndá nchaa sá vãha cúdĩ iní-ó. ⁷ Te nchaa sá yãha-o sàcahnu iní-ó, te sàni váha iní-ó cuèndá nchaa ñáyiú, te sàni iní-ó sã díú-ní nchaa sá vãha cuu xii nchaa tnàha ñáyiú-o ndèè cuèé-gá, te ío quìde cahnu iní-ó cuèi nãndi sá yãha-o, te nchaa xíãⁿ quídé-ó te núu cùu iní-ó cuè tnaha ñáyiú-o.

⁸ Te ni caa ni quíhíⁿ duha-ni cuu iní-ó cuè tnaha ñáyiú-o. Dico sáá nduu te vá cóó-gă ñáyiú

cáháⁿ tnúhu sá dácàhu iní ñáhá Yă Ndiǒxí, te ni vă cóó-gă ñáyiu cáháⁿ tnúhu sá dácàhu iní ñáhá Espíritú Yă Ndiǒxí tnúhu sá ñà túú xìní-yu, te ni vă cóó-gă ñáyiu túha dàtná túha ñáyiu vitna. ⁹ Te vitna ñá túú cùtnuní iní-ó nchaa nacuáa sàni iní Yă Ndiǒxí chi sacú-ni cùtnuní iní-ó, te ducaⁿ sàcú-ni cáháⁿ-ó nàcuáa ndùu tnúhu-gá, dico cáháⁿ-ó tnúhu-gá nàcuáa dàcahu iní ñáhá-gă xii-o. ¹⁰ Te na sàá nduu càda Yă Ndiǒxí nchaa nàcuáa tàú-xi cundu, te dāvá-áⁿ te nchaa sá cächí-gă ñá túú ndècu-xi nacuáa tàú-xi cundu vâ dúcáⁿ-gă cundecu-xi.

¹¹ Te yúhú cùtnàhá ní cuu landú-í ní xóo cada-í sá cùu-í landú, ní xóo cáháⁿ-í, ní xóo cani iní-í, te ní xóo tecú tnùn-í dàtná quidé cuè landú xíndecu vitna, dico sáta ní cuu-í ñⁿ tée cùu sacuéhé te ñá túú-gă quidé-í dàtná ní xóo cada-í cùtnàhá ní cuu landú-í. ¹² Te ducaⁿ sãtnahá-xi cùu-o vitna ndecu-o ichi Xítóhó Jesucrístú, chi ñá túú cùtnuní váha iní-ó nàcuáa cùu cuendá Yă Ndiǒxí, te cùu-o datná ñáyiu ndèhe ñⁿ núu yùtátá sã ñà túú tũu váha núu-xi, te ducaⁿ sãtnahá-xi cùu-o chi ñá túú cùtnuní váha iní-ó nãsa cùu cuendá-gă, dico sáá nduu quíní núu-ó-gă. Te nchoo sàcú-ni cùtnuní iní-ó nàcuáa ndùu-gă vitna dico na sàá nduu te quíní ndáá-ó nàcuáa càa nacuáa ndùu-gă dàtná xìní ñáhá mèe-gă xii-o. ¹³ Te ni caa ni quíhíⁿ ducaⁿ-ni quíndáá iní-ó Yă Ndiǒxí, te ducaⁿ-ni cùndecu ndihí-o tnúhu ndee iní cundecu-o ndihí-gă, te ducaⁿ-ni ïo cuu iní-ó-gă ndihí tnàha ñáyiu-o. Te sá cúu iní-ó Yă Ndiǒxí ndihí sá cúu iní-ó tnàha ñáyiu-o xíⁿ ío-gă cúnùu-xi dacúúxí dâva-gă.

Ñáyiú cǎháⁿ tnúhu sá dǎcǎhu iní ñáhá Espíritú Yǎ Ndiǒxí

¹ Te vá dáńá ndèé-ndó cùu iní-ndó tnàha ñáyiú-ndo, te cuhuⁿ iní-ndó sǎ ndùu táhú-ndó nǔú Yǎ Ndiǒxí títńí nùú chùuⁿ cada-ndo nacuáa chindee ñàha Espíritú-gá xii-ndo, te ío cuhuⁿ iní-ndó sǎ ndúú táhú-ndó cǎháⁿ-ndó tnúhu sá dǎcǎhu iní ñáhá Yǎ Ndiǒxí xii-ndo. ² Te cue ñáyiú cǎháⁿ tnúhu sá dǎcǎhu iní ñáhá Espíritú Yǎ Ndiǒxí tnúhu sá ñà túú xìní-yu, te tnúhu cǎháⁿ-yu-án cúú-xí sǎ cúú-xí Yǎ Ndiǒxí te ñá díú sǎ cúú-xí ñáyiú chí ñà túú təcú tnùní-yu, te mee Espíritú Yǎ Ndiǒxí quídé-xí dùcaⁿ cǎháⁿ-yu tnúhu yìyuhu. ³ Te cue ñáyiú ní nduu táhú nǔú Yǎ Ndiǒxí cǎháⁿ tnúhu sá dǎcǎhu iní ñáhá-gǎ xii-yu, te ñáyiú-án dǎcǎháⁿ-yu ñáyiú nàcuáa cuita níhí ndéé-gǎ-yu cundecú-yu ichi-gá, te ducaⁿ cuǎñáhá-yu tnúhu ndee iní xii-yu òré ndìhú iní-yu. ⁴ Te ñáyiú cǎháⁿ tnúhu sá dǎcǎhu iní ñáhá Espíritú Yǎ Ndiǒxí xii-yu tnúhu sá ñà túú xìní-yu-án, ñáyiú-án mee-ní-yu níhí ndéé-yu ndècú-yu ichi-gá. Dico ñáyiú cǎháⁿ tnúhu sá dǎcǎhu iní ñáhá-gǎ xii-yu, cǎháⁿ-yu tnúhu-án nàcuáa níhí ndéé dǎva-gá ñáyiú nchìcúⁿ nihnu ichi-gá.

⁵ Te yúhú ío cudǐí ìní-í te nùu nchaa-ndo cǎháⁿ-ndó tnúhu sá dǎcǎhu iní ñáhá Espíritú Yǎ Ndiǒxí xii-ndo tnúhu sá ñà túú xìní-ndó. Dico ío-gá cudǐí ìní-í te nùu nchaa-ndo cǎháⁿ-ndó tnúhu sá dǎcǎhu iní ñáhá-gǎ, chí ío-gá xíní ñùhu-xi sá cǎháⁿ-ndó tnúhu-án dǎcúúxí sǎ cǎháⁿ-ndó tnúhu sá dǎcǎhu iní ñáhá Espíritú-gá cǎháⁿ-ndó tnúhu sá ñà túú xìní-ndó. Dico ìⁿ-ní nǔtnahá-xi quìde-ndo te nùu nchòhó ñáyiú cǎháⁿ tnúhu sá dǎcǎhu iní ñáhá

Espíritú-gá cáháⁿ-ndó nàcuáa quèe-xi tnúhu-án. Te ducaⁿ te nchaa ñáyi ndècu ichi Yá Ndióxi cuita níhí ndéé-gă-yu quíhíⁿ cundecú-yu ichi-gá. ⁶ Te núu yúhú quexìo-í núú ndécú nchòhó ñáyi ndècu ndihí-í ichi Xítohó Jesucrístú, te ngüita-í cáháⁿ-í mee-ni tnúhu sá dácàhu iní ñáhá Espíritú Yá Ndióxi xii-í tnúhu sá ñà túú xiní-í, te ñà túú nã sá vâha cuu-xi sá cúú-xi-ndó. Dico cuu-xi sá vâha xii-ndo te núu na cáháⁿ-í núú-ndó ncháa tnúhu sá dánèhè ñáhá Yá Ndióxi xii-í tnúhu sá vâtá dácùàha-gá-í, ndihí nchaa tnúhu sá sà xiní-í, ndihí nchaa tnúhu sá dácàhu iní ñáhá-gă xii-í cáháⁿ-í, ndihí nchaa dava-gá tnúhu-gá.

⁷ Te na càda-o cuendá sá nũu ìⁿ tée tiú-dé vîlu àdi cani-dé àrpá te núu ñà túú sàhnú-dé ndihí-xi ìⁿ yaá, te ñà cútnùní iní-ó nã yaá caní-dě àdi ná yaá tiú-dé te núu ducaⁿ na càda-dé. ⁸ Te diu-ni ducaⁿ sãtnahá-xi cùu tucu tée cùu sandadú tiú cútú, chi núu vá tiú váha-dé nàcuáa tàú-xi cunduu òré quíhíⁿ-güedé nàá-güedé, te vá ngündecu túha dava-gá cue sandadú te núu ducaⁿ na càda-dé vá tiú váha-dé. ⁹ Te ducaⁿ sãtnahá-xi cùu nchohó te núu vá cáháⁿ-ndó ìⁿ tnúhu nàcuáa tàú-xi cunduu núú ñáyi te vá tècú tnùní-yu tnúhu cáháⁿ-ndó. ¡Chi àúⁿ nã cuu cáháⁿ-ndó te núu ducaⁿ na càda-ndo! ¹⁰ Te ío titní núú tnúhu òo ñuyíú, te ìⁿ ìⁿ núú tnúhu-án cútnùní iní ñáyi nàcuáa quèe-xi. ¹¹ Te núu nchoo ñà tècú tnùní-ó ìⁿ tnúhu cáháⁿ ìⁿ ñáyi, te quide-ó-yu ñáyi ñúú xícá chi ñà túú cáháⁿ-yu tnúhu cáháⁿ-ó, te diu-ni ducaⁿ quide ñahá-yu xii nchoo tùcu. ¹² Te xíáⁿ nũu càhí tnúhu-í xii nchaa nchòhó ñáyi ío cuíní nduu táhú nũú Yá Ndióxi sá Espíritú-gá chindee ñàha-xi xii-ndo cada-ndo ná

daha núú chiúⁿ, te ío nducu ndèe-ndo cada-ndo chiuⁿ sá nǐ nduu táhú-ndó ñàcuáa cuita níhí ndéé-gã ñáyiu ndècu ichi-gá quíhíⁿ.

13 Te núú càháⁿ-ndó tnúhu sá ñà túú xìní-ndó, tnúhu sá dácàhu iní ñáhá Espíritú Yă Ndiôxí xii-ndo, te xìni ñuhu-xi sá càcáⁿ táhú-ndó nǔú Yă Ndiôxí cuendá sá ná chindee ñaha-gá xii-ndo càháⁿ-ndó nǔú ñáyiu núú nása quèe-xi tnúhu-áⁿ.

14 Chi núú nchoo na càháⁿ ndihí-o Yă Ndiôxí ndihí tnúhu sá ñà túú xìní-ó, te ni yùhu ni iní-ó càháⁿ ndihí-o-gã dìcò-ni sá ñă tècú tnùnì-ó nàcuáa ndùu tnúhu càháⁿ-ó.

15 Te xíăⁿ nǔú xìni ñuhu-xi càháⁿ ndihí-o Yă Ndiôxí ni yùhu ni iní-ó nàcuáa chindee ñaha Espíritú-gá xii-o te càháⁿ-ó nàcuáa tecú tnùnì-ó, te ñiu-ni ducaⁿ càda-o oré xítá yùhu-o chiñuhu-o Yă Ndiôxí, chi ni yùhu ni iní-ó dùcaⁿ cada-o nàcuáa chindee ñaha Espíritú-gá xii-o, te cùtnuní iní-ó nàcuáa cuáháⁿ nchaa tnúhu càháⁿ-ó xítá-o.

16 Chi núú nchoo na ndàcáⁿ táhú-ó nǔú Yă Ndiôxí ndihí mee-ni tnúhu sá ñà túú xìní-ó tnúhu sá dácàhu iní ñáhá Espíritú-gá xii-o, te ñáyiu ñă túú ní ndùu táhú càháⁿ tnúhu càháⁿ-ó ndèdóho ñàhá-yu xii-o, te ñáyiu-áⁿ vă ndácũ-yu càháⁿ-yu tnúhu càháⁿ-ó ndàcáⁿ táhú-ó ndihí-yu núú Yă Ndiôxí chi ñà túú tècú tnùnì-yu tnúhu càháⁿ-ó.

17 Te vâha-ni quède-o sá dúcáⁿ càháⁿ-ó ndàcáⁿ táhú-ó nǔú Yă Ndiôxí, te dìcò-ni sá tnúhu-áⁿ ñà túú chindee-xi ñáyiu nàcuáa cuita níhí ndéé-gã-yu cundecú-yu ichi-gá.

18 Te yúhú ío ndàcáⁿ táhú-í núú Yă Ndiôxí chi càháⁿ-í tnúhu sá ñà túú xìní-í tnúhu sá dácàhu iní ñáhá Espíritú-gá xii-í, te càháⁿ-gá-í dàcúúxí nchâa nchohó.

19 Te òré tàcá ñáyiu ndècu ichi Yă Ndiôxí dàcuàhá-yu tnúhu-gá, te càháⁿ-í tnúhu-gá nǔú-yu sá sà ní cutnùnì iní mée-í nàcuáa

ducaⁿ cùtnuní iní-yu nàcuáa ndùu tnúhu càháⁿ-í. Te tnàhá-gá iní-í cáháⁿ-í úhúⁿ-ni tnúhu-áⁿ nũ-yu dàcúúxí sã càháⁿ-í úxí mĩ tnúhu sá ñà túú xìní-í, tnúhu sá dácàhu iní ñáhá Espíritú Yã Ndiõxí xii-í càháⁿ-í.

20 Te nchòhó ñáyiu ndècu ndìhi-í ichi Xítohó Jesucristú, vá caní iní-ndó dàtná sání iní cue landú, chi cani iní-ndó dàtná tàú-xi cunduu chi sa sacuéhé-ndó. Dico cuu-ndo dàtná cue landú lihli vá cùndècu-ndo ichi cuehé ichi duha, chi cue landú-áⁿ ñà túú ndècu-güexi ichi-áⁿ. 21 Te núú tütú Yã Ndiõxí càháⁿ-xi nàcuáa ní cáháⁿ-gá, te càchí-xi: “Cue tée ñuú xícá càháⁿ ndi dñíⁿ nũú tnũhu quihíⁿ-güedé cáháⁿ-güedé tnúhu-í núú ñáyiu israél cada-güedé núu-í, te cuèi ducaⁿ dico vá quindáá iní-yu tnúhu-í”, duha ní cachí Yã Ndiõxí te ducaⁿ ñĩ ngundeé núú tütú-gá. 22 Te tnúhu sá dácàhu iní ñáhá Espíritú Yã Ndiõxí xii-o tnũhu sá ñà túú xìní-ó, xíãⁿ cúú-xí cuèndá sá cùtnùní iní cue ñáyiu ñã túú sàndáá iní tnúhu Yã Ndiõxí sá ñà túú cùu váha iní ñáhá-gã xii-yu. Dico sá cúú-xí cuè ñáyiu sàndáá iní tnúhu-gá ñã túú ñã quidé-xí sã cúú-xí-yu. Te tnúhu sá dácàhu iní ñáhá Yã Ndiõxí xii-o, xíãⁿ cúú-xí cuèndá sá cùtnùní iní cue ñáyiu sàndáá iní tnúhu-gá sá ndécú ndìhi ñaha-gá xii-yu, dico ñã túú dùcaⁿ sani iní cue ñáyiu ñã túú sàndáá iní tnúhu-gá. 23 Te núu ní tacá nchaa nchòhó ñáyiu ndècu ichi Yã Ndiõxí, te nchaa-ndo ñĩ ngüita-ndo càháⁿ-ndó tnũhu sá dácàhu iní ñáhá Espíritú Yã Ndiõxí xii-ndo tnũhu sá ñà túú xìní-ndó, te mei òré-áⁿ quexio cue ñáyiu ñã túú sàndáá iní tnúhu-gá, ndìhi cue ñáyiu vátá quini dana-gá tnúhu-gá núú ndécú-ndó, te ñáyiu-áⁿ quesàhá-yu sá lùcú-ndó te núu ducaⁿ

càháⁿ-ndó tnũhu sá dácàhu iní ñáhá Espíritú-gá xii-ndo òré quexió-yu. ²⁴ Dico núu nchaa-ndo càháⁿ-ndó tnũhu sá dácàhu iní ñáhá Yă Ndiõxí xii-ndo, te meî òré-áⁿ quexio cue ñáyiu ducaⁿ ñà túú sàndáá iní-xi tnũhu-gá, ndihî cue ñáyiu ducaⁿ ñà túú xìní dana tnũhu-gá-áⁿ, te ñáyiu-áⁿ cutnùní iní-yu sá ndécú cuěchi-yu núú-gă, te ngũíta-yu cuáha-yu cuendá sá ñà túú quide váha-yu ndécú-yu cuendá sá càháⁿ-ndó tnũhu-gá ndèdóho-yu. ²⁵ Te nchaa sá cuèhé sá dúhá ñă quidé-yu sàni iní-yu yìyuhu ndacu iní-yu, te ngũíta-yu náhmá-yu nchaa sá ñà túú váha ní quidé-yu núú Yă Ndiõxí, te cachí-yu sá ïo càhnu cuu-gá, te cachí tucú-yu sá ndàá ndécú ndihî-ndo-gá.

Cada-o nàcuáa tàú-xi cunduu

²⁶ Te vitna nchòhó ñáyiu ndècu ndihî-í ichi Xítóhó Jesucrístú xìni ñuhu-xi duha cada-ndo. Òré tàcá-ndó te dava-ndo càta yuhu-ndo chiñuhu-ndo Yă Ndiõxí, te dava-ndo dāsahú-ndó ñáyiu tnũhu-gá, te dava-ndo cǎháⁿ-ndó nàcuáa dàquixi túu Yă Ndiõxí iní-ndó, te dava-ndo cǎháⁿ-ndó tnũhu sá dácàhu iní ñáhá Espíritú Yă Ndiõxí xii-ndo tnũhu sá ñà túú xìní-ndó, te dava-ndo cǎháⁿ-ndó nàcuáa quèe-xi tnũhu-áⁿ. Te nchaa sá quidé-ndó ná cùu-xi nacuáa chindee-xi ñáyiu nàcuáa cuita níhí ndéé-gă-yu cundecú-yu ichi-gá. ²⁷ Te òré càháⁿ-ndó tnũhu sá dácàhu iní ñáhá Espíritú Yă Ndiõxí xii-ndo tnũhu sá ñà túú xìní-ndó, te úú-ni-ndo àdi úní-ni tnàhá-ndó cǎháⁿ-ndó tnũhu-áⁿ te vá úúⁿní cǎháⁿ-ndó chi ndéé ndihî ïⁿ-ndo te dǎtnùní ngũíta ingá-ndó cǎháⁿ-ndó. Te xìni ñuhu-xi sá ïⁿ ñáyiu cáháⁿ-yu nàcuáa quèe-xi tnũhu

càháⁿ-ndó-ǎⁿ. ²⁸ Te núu ñá túú ñáyiú tècú tnùní nàcuáa quèe-xi tnúhu càháⁿ-ndó-ǎⁿ, te núú méé nǔú ñáⁿ-ní-ndó cǎháⁿ-ndó tnǔhu-áⁿ cǎháⁿ ndihí-ndo Yá Ndiòxí te vá càháⁿ-ndó nǔú ñáyiú. ²⁹ Te òré càháⁿ-ndó tnǔhu sá dácàhu iní ñáhá Yá Ndiòxí xii-ndo te úú-ni-ndo àdi úní-ni tucu-ndo cǎháⁿ, te dava-gá-ndó cùndedóho-ndo tnǔhu-áⁿ te cǎháⁿ-ndó nǔú váha-ni càháⁿ-güedé àdi ñá túú vǎha-ni. ³⁰ Te núú ñáⁿ-ndo ñí dácáhú iní ñáhá Yá Ndiòxí xii-ndo ñáⁿ tnúhu cǎháⁿ-ndó, te núú ñáⁿ-ndo sà cǎháⁿ-ndó te ngüíñí-ndó te quíhu tucu ingá-ndó cǎháⁿ-ndó nàcuáa ní dácáhú iní ñáhá Yá Ndiòxí xii-ndo. ³¹ Te nchaa nchòhó ñáyiú ní nduu táhú cǎháⁿ tnúhu sá dácàhu iní ñáhá Yá Ndiòxí, te vá úúⁿ-ní cǎháⁿ-ndó chí díhna-gá ñáⁿ-ndo cǎháⁿ te dǎtnùní cǎháⁿ tucu ingá-ndó. Te ducaⁿ càda-ndo cuendá nchaa-ndo tècú tnùní-ndó nàcuáa ndùu tnúhu càháⁿ ñáⁿ ñáⁿ-ndo, te ducaⁿ te cudíⁿ-gǎ iní-ndó cànchicúⁿ nihnu-ndo ìchi-gá. ³² Te nchaa ñáyiú càháⁿ tnúhu Yá Ndiòxí sa nàha-ná méé-yu nàcuáa quidé-yu càháⁿ-yu tnúhu-gá nàcuáa ñá túú quíde cutexínu-yu. ³³ Te Yá Ndiòxí cúú-gǎ Yaá quidé ïo váha cùu ñáⁿnuu-ndo ndecu-ndo, te ñá túú dàticá nuu ñaha-gǎ xii-ndo.

Te na càchí tnúhu-í xii-ndo nàcuáa càháⁿ-í nchaa núú tàcá cue ñáyiú ndècu ndihí-o ichi Xítohó Jesucristú. ³⁴ Te yúhú càchí-í sá vǎ cúú cǎháⁿ cue ñáyiú díhí òré tàcá-ndó dàcuaha-ndo tnúhu-gá, chí ñá túú dùcaⁿ cuíní-gá cadá-yu, te quíndáá-ni iní-yu cadá-yu nàcuáa tàú-xi cunduu. ³⁵ Te núu ñáⁿ sá cuíní-yu nducu tnǔhu-yu te ndéé òré nasáá-yu vehé-yu te nducu tnǔhu-yu núú yíⁿ-yu, chí ñá túú ndùu váha-xi sá càháⁿ-yu núú tàcá nchaa ñáyiú

dàcuáha ndihí-yu tnúhu-gá.

³⁶ Te chí dándàcu iní sá ñà díú nchòhó cúú-ndó ñáiyu ní ngúndecu ndihí tnúhu Yá Ndiõxí díhna nuu nàcuáa datècú tnúhu-ndo dàva-gá ñáiyu, te ni ñà díú mèe-ni nchòhó sa ní ngúndecu ndihí-ndo tnúhu Yá Ndiõxí vitna, núu xiãⁿ vá càchí-ndó sã ïo cùnuyu-ndo. ³⁷ Te núu dava nchòhó sání ìní-ndó sã càháⁿ-ndó nàcuáa dàcahu iní ñáhá Yá Ndiõxí xii-ndo àdi sani ìní-ndó sã quidé-ndó nàcuáa chindee ñaha Espíritú-gá xii-ndo, te cuáha váha-ndo cuèndá sá ncháá tnúhu càháⁿ-í-a cùu-xi tnúhu sá ní cachí tnúhu mee Xítohó Jesucristú cada-o. ³⁸ Te ndéda-ni caa ñáiyu ndècu ndihí-ndo te núu ñá túú sàndáá ìní-yu tnúhu càháⁿ-í, te vá cáda cuèndá-ndó tnúhu càháⁿ-yu.

³⁹ Te vitna nchòhó ñáiyu ndècu ndihí-í ichi Xítohó Jesucristú, ío cani ìní-ndó càháⁿ-ndó tnúhu sá dácàhu iní ñáhá Yá Ndiõxí núu ñáiyu, te daña-ndo na càháⁿ cue ñáiyu ní nduu táhú núú Yá Ndiõxí sá càháⁿ-yu tnúhu sá dácàhu iní ñáhá Espíritú-gá xii-yu tnúhu sá ñà túú xini-yu. ⁴⁰ Te cada-ndo ncháa nacuáa tàú-xi cunduu nàcuáa ñá túú nã cuu cundecu-ndo.

15

Ní ndoto Xítohó Jesucristú

¹ Te vitna nchòhó ñáiyu ndècu ndihí-í ichi Xítohó Jesucristú cuini-í sá dándàcu ìní-ndó nàcuáa ní dánèhé ñáhà-í xii-ndo tnúhu sá càháⁿ nàcuáa naníhí tãhú-ó, chí díu tnúhu-áⁿ ní sàndáá ìní-ndó te nchìcúⁿ nihnu-ndo. ² Te sá xii tnúhu-áⁿ níhnú-ndó ìchi cuáháⁿ-ndó núú ndúú tãhú-ndó cundecu-ndo ndihí Yá Ndiõxí ni caa ni quihíⁿ, te ducaⁿ ndùu

táhu-ndó nũ cùndècu-ndo ni caa ni quíhíⁿ ndihí Yá Ndiõxí te núu nchìcúⁿ nihnu-ndo nàcuáa ní dánèhé ñáhà-í xii-ndo, te núu ñá túú nchìcúⁿ nihnu-ndo te ñá túú ní sàndáá iní-ndó nàcuáa tàú-xi cunduu.

³ Te yúhú sa ní cachí tnúhu-í xii-ndo ìⁿ tnúhu sá ïo cùnuu ní níhì-í, chi ní cachí tnúhu-í xii-ndo sã Xìtohó Jesucrìstú ní xihí-gá cuèndá nchaa yíca cuèchi-o, te ducaⁿ ñí cuu chi ducaⁿ càháⁿ-xi núú tùtú Yá Ndiõxí sá dúcáⁿ yáha-gá. ⁴ Te ní chindúxi ñaha-güedë xii-gá te nduu úní ní dándótó ñaha Yá Ndiõxí xii-gá, te ducaⁿ ñí cuu chi ducaⁿ càháⁿ-xi núú tùtú Yá Ndiõxí. ⁵ Te sátá ñí ndoto-gá te ní quee túu-gá núú tẽ Pèlú, te dàtnùní ní quee túu-gá núú dàva-gá cue téé ní táúchíúⁿ-gã cáháⁿ tnúhu-gá. ⁶ Te sátá dúcáⁿ te dàtnùní ní quee túu-gá núú ùhúⁿ cièndú cue ñáyíu ndècu ichi-gá, te vài-yu xíndecu-ní-yu vitna chi sacú-ni-yu ní xihí. ⁷ Te dàtnùní ní quee túu-gá núú tẽ Jàcobó, te sátá dúcáⁿ te dàtnùní ní quee túu-gá núú nchaa cue téé ní táúchíúⁿ-gã cáháⁿ tnúhu-gá.

⁸ Te ndéé núú ñí ndihí-ná te ní quee túu-gá núú mée-í, te òré ní quee túu-gá núú-í te cùu-í dàtná ìⁿ déhe yíquìⁿ vátá sàá-gá nduu càcu chi cùu-í ìⁿ téé ñá túú sàni váha iní-xi cuèndá-gá ní cùu. ⁹ Te yúhú ñá túú cùnuu-í dàtná cùnùu cue téé ní táúchíúⁿ Xìtohó Jesucrìstú cáháⁿ tnúhu-gá. Te cùu-í ìⁿ téé ní táúchíúⁿ-gã cáháⁿ tnúhu-gá, cuèi ñá túú tàú-í sá càháⁿ-í tnúhu-gá, chi ní xóo cuu ùhú iní-í cue ñáyíu ndècu ichi Yá Ndiõxí. ¹⁰ Dico Yá Ndiõxí ío váha iní-gá chi ní quide ñaha-gã xii-í ìⁿ téé váha, chi ñá túú-gã quidè-í dàtná ní xóo cada-í. Te ío cùndahú iní ñáhá-gã chíndèe ñaha-gá xii-í dico ñá túú àúⁿ nã cuu chíndee ñaha-gá, chi ío-gá vài chiuⁿ-gá ní

cuu sa ta quide-í cuháⁿ dàcúxí dàva-gá cue téé ní táuchíúⁿ-gá cáháⁿ tnúhu-gá te ñá díú mèe-í ducaⁿ quide-í chi mee Yă Ndiõxí ío cùndahú iní ñáhá-gă chîndèè ñaha-gá xii-í quidè-í chîuⁿ-gá. ¹¹ Te ñá túú nă cada-xi cuëi dava-gá-güedé sa ní cuu vâi-gá chîuⁿ-gá quidé-güedě àdi yúhú, chi ìⁿ-ni tnúhu càháⁿ-ndí te tnúhu-áⁿ cúú tnúhu ní sándáá iní-ndó.

Cue ñáyiú ní xíhí ndotó-yu

¹² Te nchúhú cue téé càháⁿ tnúhu Xítóhó Jesucristú càháⁿ-ndí sá ñí xíhí-gá te ní ndoto-gá, ¿te ná cuendá dava nchòhó càchí-ndó sã vã ndótó cuè ñáyiú ní xíhí? ¹³ Te núu ducaⁿ sàni iní-ndó sã vã ndótó cuè ñáyiú ní xíhí te ni Xítóhó Jesucristú ñá túú ní ndòto-gá te núu ducaⁿ. ¹⁴ Te núu dicó Xítóhó Jesucristú ñá túú ní ndòto-gá ñá, te nchaa tnúhu sá dánèhé ñáhá-ndí xii-ndo ñà túú nàndíhi-xi te núu ducaⁿ, te àúⁿ nă cuu sándáá iní-ndó-gă te núu ducaⁿ. ¹⁵ Te núu dicó cúú-xí ìⁿ sá ndàá tnúhu sàni iní dava-ndo ña, te dàcuandehnde-ndí sá càháⁿ-ndí tnúhu Yă Ndiõxí núú-ndó te núu ducaⁿ, te ñá túú càháⁿ ndáá-ndí núú-ndó sã Yă Ndiõxí ní dándótó-gă Xítóhó Jesucristú, te núu ndáá nàcuáa sàni iní dava-ndo sã vã ndótó cuè ñáyiú ní xíhí, dico ñá ndáá nàcuáa sàni iní-ndó. ¹⁶ Te núu vâ ndótó cuè ñáyiú ní xíhí te ni Xítóhó Jesucristú ñá túú ní ndòto-gá. ¹⁷ Te núu Xítóhó Jesucristú ñá túú ní ndòto-gá ñá, te àúⁿ nă cuu sándáá iní-ndó-gă te núu ducaⁿ, te ndècu-ni cuéchi-ndo núú Yă Ndiõxí te núu ducaⁿ. ¹⁸ Te núu ndáá nàcuáa sàni iní-ndó ñá te cue ñáyiú ní sándáá iní ñáhá xii Xítóhó Jesucristú ñáyiú ní xíhí ní xíta nihnú-yu te núu ducaⁿ. ¹⁹ Te núu nchoo ndècu ndíhi-o tnúhu ndee iní núú

Xítohó Jesucrìstú cuèndá-ni sá cúndècu-o ñuyíú-a ña, te cùu-o ñáyiu ío-gá duuⁿ duuⁿ ndàhú sá cúú-xí dàva-gá ñáyiu te núu ducaⁿ.

²⁰ Dico ndáá sá Xítohó Jesucrìstú ní xíhí-gá te ní ndoto-gá nõu xíáⁿ cútnùní iní dava-o sã ndótó cuè ñáyiu ní xíhí ñáyiu ní sándáá iní tnúhu-gá. ²¹ Te sá cuèchi ìⁿdìi-ni téé ní xíndecu ñuyíú-a xíáⁿ xíhí ñáyiu, te sá cuèndá ìⁿdìi-ni tucu íngá téé te ndoto cue ñáyiu ní xíhí. ²² Te nchaa ñáyiu xíhí-yu sá cuèchi ìⁿ téé, te téé-án cúú-dě ndíi Àdán téé díhna nuu ñí cuu ñaní tnáhá cuè ñáyiu ñuyíú. Te diu-ni ducaⁿ sã cuèndá ìⁿdìi-ni téé te ndoto cue ñáyiu ní xíhí, te téé-án cúú-dě Xítohó Jesucrìstú chi nchaa ñáyiu ndècu ndihí-gá ndotó-yu. ²³ Te díhna-gá Xítohó Jesucrìstú ní ndoto-gá xíáⁿ cútnùní iní dava-o sã ndùu na quixi tucu-gá ñuyíú-a te dává-án ndoto nchaa ñáyiu ní xíhí ñáyiu ní sándáá iní tnúhu-gá. ²⁴ Te dătnùní ducaⁿ te sáá nduu nàa nchaa sá ío ñuyíú, te Xítohó Jesucrìstú danàa-gá nchaa ndi túhú sá cúnùu ío ñuyíú-a, chi danàa-gá nchaa ñáyiu ío cúnùu, ndihí yucu ñávãha, ndihí nchaa espíritú xínú cuèchi núú-xi. Te ducaⁿ te cúñaha-gã xii Tătá-ó Dütú Ndiõxí taxi tnùní-gá. ²⁵ Chi Xítohó Jesucrìstú dacuítíí tàxi tnuní-gá ndéé ná sàá nduu dànaa-gá nchaa sá cúú ùhú iní ñáhá xii-gá. ²⁶ Te ndéé núú ñí ndihí-ná te danàa-gá sá quidé xíhí ñáyiu. ²⁷ Te ducaⁿ chi càháⁿ-xi núú tütú Yã Ndiõxí sá méé-gã ní nachihí-gá nchaa sá ío ndaha Xítohó Jesucrìstú cuèndá sá méé Xítohó Jesucrìstú taxi tnùní-gá, te vá yõo ìⁿ tàxi tnuní ñáhá xii Yá Ndiõxí, chi mee Yã Ndiõxí cúú-gã Yaá ní nachihí-gá nchaa sá ío ndaha Xítohó Jesucrìstú. ²⁸ Te díhna-gá ní xáhaⁿ

Yă Ndiöxí xii Xítóhó Jesucristú Yaá cúú Dêhe-gá sá quíndaha-gá nchaa sá íó, te òré ná quíndaha Xítóhó Jesucristú nchaa sá íó, te cúñaha-gă xii Yá Ndiöxí taxi tnùní ñáhá-gă xii-gá, te ducaⁿ te mee-nă Yă Ndiöxí taxi tnùní-gá nchaandi túhú sá íó.

²⁹ Te núu ñá túú ndăá càháⁿ-í, ¿te ná cuèndá dava ñăyiu sànduté-yu cuèndá ñăyiu ní xíhí nŭu ñá túú ndăá sá ndótó ñăyiu ní xíhí?

³⁰ Te nchúhú ducaⁿ-ni sàni iní ñăyiu cahni ñáhá-yu xii-ndí, te núu vá ndótó ñăyiu ní xíhí te àúⁿ nă cuu ducaⁿ quíde cahnu iní-ndí ducaⁿ cuèní-yu cahni ñáhá-yu xii-ndí te núu ducaⁿ. ³¹ Te nchòhó ñăyiu ndècu ndìhi-í ichi Xítóhó Jesucristú ío váha sàni iní-í cuèndá-ndó, chi ndècu-o ichi-gá. Te na càchí tnúhu ndáá-í xii-ndo să ìⁿ nduu ìⁿ nduu ndéé iní ñáhá ñăyiu cahni ñáhá-yu xii-í. ³² Te núu dicó ndáá sá vă ndótó ñăyiu ní xíhí dàtná càchí dava ñăyiu, te àúⁿ nă cuu ní xíndecu-í ñúú Éfesú ní cuu úhú iní ñáhá ñăyiu xii-í te núu ducaⁿ, chi ñăyiu-áⁿ nŭ quidé-yu dàtná quidé ìⁿ quiti dééⁿ să cúú-xì-í. Te núu ndáá sá vă ndótó ñăyiu ní xíhí ñá, te váha-gá nŭu cachí-ó dàtná càchí ñăyiu: “Vítna na còho-o te na càxi-o chi tneé ìdá cuú-ó”, duha càchí-yu.

³³ Te vá dáñá-ndó mée-ndo dandahú ñáhá ñăyiu ndècu ichi cuehé ichi duha xii-ndo, te ngũíta-ndo càni iní-ndó dàtná sání iní-yu. Chi quèe ndáá-xi nàcuáa càháⁿ tucu dava-gá ñăyiu, chi càchí-yu sá nŭu ñăyiu quíde váha na ñìhí tnáhă-yu ndìhi ñăyiu ndècu ichi cuehé ichi duha, te ngũíta ñăyiu quíde váha-áⁿ cadá-yu tnàhá-yu nchaa sá cuèhé sá dúhá dàtná quidé ñăyiu-áⁿ. ³⁴ Te ío váha cuáha-ndo cuèndá nàcuáa cundecu-ndo, te vá cadá-gă-ndó

dàtná quidé cuè ñáyiú ndècu ichi cuehé ichi duha. Te dava-ndo quide-ndo datná quidé cuè ñáyiú ndècu ichi cuehé ichi duha chi ñá túú sàndáá iní-ndó Yá Ndiǒxí. Te duha càháⁿ-í cuèndá sá cúcàhaⁿ núú-ndó cuèndá nchaa sá ñà túú vǎha quide-ndo.

Nàcuáa ndoto ñáyiú ní xíhí

³⁵ Te cudana dava-ndo ndècu tnúhu-ndo nǎu nása ndoto ñáyiú ní xíhí, te nása cunduu yiqui cùñú-yu òré ndotó-yu. ³⁶ Te nchòhó ñáyiú ducaⁿ càháⁿ cúú-ndó ñáyiú ñá túú tnàhí cùnuni iní-xi, te duha na càháⁿ-í nàcuáa tecú tnùní-ndó. Te núú ìⁿ tatá ná chíhí-ó te tèhyú méé-xí te xínu déhe-xi. ³⁷ Dico ñá díú sǎ sà ní xínu ta sàhnu cuáháⁿ ní cǔxi-o, te ñiu-ni ducaⁿ quide-o cuéi triú ndìhi nchaa dava-gá tatá xítú-ó. ³⁸ Te Yá Ndiǒxí quidé-gǎ sácǔnduu tatá xǐnu-áⁿ dàtná cuení méé-gǎ cunduu. Te ndèda-ni càa tatá te ñiu-ni-gá quidé-gǎ sácǔnduu-xi nàcuáa tàú-xi cunduu. ³⁹ Te ndi díⁿ ndǎa nchaa yiqui cùñú, chi tucu càa yiqui cuñú nchoo cuè ñáyiú, te tucu càa yiqui cuñú nchaa quitì xìca núú ñúhú, te tucu càa yiqui cuñú nchaa quitì ndàva, te tucu càa yiqui cuñú nchaa chácá. ⁴⁰ Te ducaⁿ ñà túú ìⁿ-ni caa nchaa yiqui cuñú sá íó andiu ndìhi nchaa yiqui cuñú ñáyiú íó ñuyíú-a, te ducaⁿ ñà túú ìⁿ-ni ndǎa vii nchaa sá íó andiu ndìhi ñuyíú-a. ⁴¹ Te ducaⁿ cùu tucu-xi nchíanchii chi tucu dàyehé-xi, te tucu dàyehé yóó, te tucu dàyehé nchaa chódíní, te ducaⁿ ñà túú ìⁿ-ni dayehé nchaa chódíní. ⁴² Te ducaⁿ sǎtnahá-xi cùu ñáyiú ní xíhí te ndoto, chi tucu càa yiqui cuñú-yu sá nguǐndǔxi te tucu cunduu yiqui cùñú-yu òré ndotó-yu, te yiqui

cùñú sá ndótó ndìhí-yu-áⁿ vǎ ndìhí ñìhnu-gá-xi. ⁴³ Te yìquì cùñú ñáyìu xìhí ñá túú nàndìhì-xi, dico yìquì cùñú sá ndótó ndìhí-yu te ío váha cunduu. Te nchaa yìquì cùñú ñáyìu xìhí ñá túú tnàhí-gá ndee-xi, dico yìquì cùñú ndoto ndìhí-yu xíǎⁿ ío cunduu ndee-xi. ⁴⁴ Te yìquì cùñú nchaa ñáyìu xìhí cúú-xí cuèndá ñuyíú-a, dico yìquì cùñú sá ndótó ndìhí-yu xíǎⁿ cundecu-ná-xi cuèndá Espíritú Yǎ Ndiǒxí. Te dàtná ío yìquì cùñú sá cúú-xí cuèndá ñuyíú-a, te ducaⁿ ío yìquì cùñú sá cúú-xí cuèndá mee-nǎ Espíritú Yǎ Ndiǒxí.

⁴⁵ Te núú tùtú Yǎ Ndiǒxí càchí-xi: “Ndíi Àdán ndíi ní xíndecu ndéé díhna ní chihí Yá Ndiǒxí iní ndíi”, duha càchí-xi núú tùtú-gá. Te ìngá tucu téé cùu-dé dàtná ndíi Àdán te téé-áⁿ cúú-dě Xítóhó Jesucrìstú, te Yaá-áⁿ quídé-gǎ sá mèe-ná Espíritú Yǎ Ndiǒxí quídé-xí ndècu-o ichi-gá vitna. ⁴⁶ Te díhna-gá yìquì cùñú cuèndá ñuyíú-a ní ngúndecu, te dàtnùní ngúndecu yìquì cùñú cundecu ndìhì mee-nǎ Espíritú Yǎ Ndiǒxí. ⁴⁷ Te téé díhna nuu ñí xíndecu ñuyíú-a chi ñuhu ní cadúha ñaha Yǎ Ndiǒxí xii-dé, te téé-áⁿ cúú-dě ndíi Àdán, te ìngá tucu téé ní cuuⁿ-dé andíu te téé-áⁿ cúú-dě Xítóhó Jesucrìstú. ⁴⁸ Te nchaa ñáyìu càa yìquì cùñú-yu dàtná cáá yìquì cùñú té Àdán téé ducaⁿ ñí cuáha ñuhu-áⁿ, te nchaa ñáyìu ní nduu táhú cundecu ndìhì téé ducaⁿ vèxi cuuⁿ andíu-áⁿ, ñáyìu-áⁿ nduu yìquì cùñú-yu dàtná cáá yìquì cùñú ní nduu táhú-dě ndécú ndìhì-dé vitna, te téé-áⁿ cúú-dě Xítóhó Jesucrìstú. ⁴⁹ Te nchaa ñáyìu ñuyíú-a càá-yu dàtná-ni càa datná-ni ndùu téé ducaⁿ ñí cuáha ñuhu-áⁿ. Te nchaa nchoo ñáyìu ní nduu táhú cundecu ndìhì téé ducaⁿ vèxi

cuuⁿ andiu-áⁿ nduu-o dàtná-ni càa datná-ni ndùu téé-áⁿ tucu.

50 Te nchòhó ñáyiu ndècu ndihi-í ichi Xítóhó Jesucristú càchí tnúhu-í xii-ndo sá ncháá nàcuáa càa yiqui cuñú ñáyiu xĩndecu vitna vá sàá-xi cundecu-xi núú ndécú Yă Ndiöxí táxi tnùní-gá, chi ñuyíú-a ndihi nihnu-xi. Dico sá tàú-xi sáá núú ndécú-gă táxi tnùní-gá xini ñuhu-xi cuu-xi sá cúdĩ cundecu. 51 Te na càchí tnúhu-í xii-ndo ñⁿ tnúhu sá yiyùhu ni cuu: Dava-o cùú-ó te dava-o cundecu-ni-o, dico nchaa-o nàdáma yiqui cuñú-ó. 52 Te uuⁿni ducaⁿ nàdáma yiqui cuñú-ó òré cáháⁿ ñⁿ cútú, te cútú-ăⁿ cáháⁿ-xi òré sa ta cüyatni naa ñuyíú. Te òré cáháⁿ cútú-ăⁿ te ndoto nchaa ñáyiu ní xihí ñáyiu ní xĩndecu ichi Xítóhó Jesucristú, te ducaⁿ te vá ñⁿ ndùu ñⁿ quíú-gă cuú-yu. Te nchaa ñáyiu ndècu vívú te nàdáma yiqui cuñú-yu tnàhá-yu. 53 Te nchaa yiqui cùnú ndécú ndihi nchaa ñáyiu ndècu ñuyíú-a vitna ñá túú cùdí-xi chi xihí-xi, dico yiqui cùnú nduu táhú nchoo ñáyiu ndècu ichi Xítóhó Jesucristú chi cudí-xi ni caa ni quíhíⁿ chi vá cùú-gá-xi. 54 Te òré ná ndùu táhú-ó yiqui cuñú sá dúcáⁿ cùdí ni caa ni quíhíⁿ-áⁿ, te vá cundècu ndihi-gá-ó yiqui cuñú sá ñà túú cùdí. Te dàvá-áⁿ te quee ndáá-xi nàcuáa càháⁿ-xi núú tütú Yă Ndiöxí núú càchí-xi: “Vitna ñá túú-gă xihí ñáyiu chi mee-nă Yă Ndiöxí cùnù-gá táxi tnùní ñáhá-gă xií-yu. 55 Te ñá túú tnàhí-gá ná ndoho ñáyiu sá cuendá tnúhu xihí, chi vá cóó-gă tnúhu xihí”, duha càchí-xi núú tütú Yă Ndiöxí. 56 Te cue ñáyiu ndècu ndihi-yu tnúhu sá sánú ñchi ñaha xií-yu nàcuáa cadá-yu cundecú-yu dico uuⁿ-gá quídě-yu

nchaa sá cuèhé sá dúhá. Te sá cuèndá nchaa sá cuèhé sá dúhá quidé-yu-áⁿ, te xiáⁿ ní ngúndecu tnúhu xihí dándòho ñaha-xi xii-yu. ⁵⁷ Dico táxăhu xii Yá Ndiöxí chi ní taxi-gá tnúhu ndee iní ndécú ndìhi-o sá sàá nduu te vá quìní-gá-ó tnúhu xihí, te ducaⁿ chi ndècu ndìhi-o Xítóhó Jesucrístú.

⁵⁸ Te xiáⁿ nŭu càháⁿ-í dóho nchòhó cue ñáyiu ndècu ndìhi-í ichi Xítóhó Jesucrístú chi ío cùu iní ñáhà-í xii-ndo, te càháⁿ-í dóho-ndo sá cáncícúⁿ nihnu-ni-ndo ichi Xítóhó Jesucrístú cuèi nándi na càda ñaha ñáyiu xii-ndo sá cuèndá-gá, te ío nducu ndèe-ni-ndo cada-ndo chiuⁿ-gá, chi sa nàha-ndo sá ncháá chiuⁿ quide-o cuendá-gá ñá túú àúⁿ nă cuu quide-o.

16

Nàcuáa sàcáⁿ tnáhá ñáyiu díhúⁿ

¹ Te na càchí tnúhu-í xii-ndo cuèndá díhúⁿ sá sàcáⁿ tnáhá-ndó sá cúú-xí ñáyiu ñuú Jerusàlén, chi ñu-ni duha ní dánèhé-í cue ñáyiu xĩndecu ichi Xítóhó Jesucrístú ndécú ìⁿ ìⁿ xichi distritú Gàlaciá.

² Te duha cada-ndo ndì tnahá nduu ndumìngú, te ìⁿ ìⁿ-ndo dàquee ñuⁿ-ndo sacú díhúⁿ nàcuáa chĩndee ñaha Yá Ndiöxí xii-ndo ñihí-ndó cuèndá òré quexìo-í te sa cundecu túha díhúⁿ-ăⁿ. ³ Te òré quexìo-í te mee-ndo căxi-ndö-yu núu ndèdacàa-yu sàni iní-ndó càda ndáá canehe díhúⁿ-ăⁿ quíhíⁿ ndaha ñáyiu xĩndecu ichi Xítóhó Jesucrístú ndécú ñuú Jerusàlén. Te cadúha-í ìⁿ ũú tutú canehé-yu quíhíⁿ cuèndá cutnùní iní ñáyiu ñuú Jerusàlén nàcuáa ndùu chiuⁿ cuáháⁿ-yu. ⁴ Te núu xini ñuhu-xi sá quíhíⁿ-í te candeca-í-yu quíhíⁿ.

Té Păblú sání iní-dé quíngoto-dé cue ñáyiú ndècu ichi Xítóhó Jesucrìstú

⁵ Te yúhú sání iní-í yáha-í ìⁿ úú ñuú cáá dístítú Macèdoniá, te dătnùní ducaⁿ te sáá-í núú ndécú-ndó. ⁶ Te òré quexìo-í te cudana cundecu ndìhì ñaha-ï xii-ndo vài nduu, àdi cudana te cundecu ndìhì ñaha-ï xii-ndo ndéé yáha nchaa yóó quídé vïxiⁿ-xi. Te sátá dúcáⁿ te cada ndee iní-ndó chindee ñaha-ndo xii-í òré nucúhuⁿ ichi-í te núú ndéé ichi na quìhìⁿ-í. ⁷ Te duha càháⁿ-í chi núú Yá Ndiöxí ná càchí-gá te cundecu ndìhì ñaha tnàa-í xii-ndo òré quexìo-í te ñá díú dícó-ni ichi yáha-í. ⁸ Te cundecu-ni-í ñuú Éfesú-a ndéé tnahá vico Pentecòstés. ⁹ Te ducaⁿ chi iha ío tèdóho ñáyiú tnúhu Xítóhó Jesucrìstú sá càháⁿ-í núú-yu. Núú xíăⁿ ío váha quèe cuendá cada-í chiúⁿ-gá cuèi ío vài ñáyiú ñá túú tnàhá iní-yu sá càháⁿ-í tnúhu-gá.

¹⁰ Te núú na quìxi coto ñaha té Timùteú xii-ndo, te ío váha cuu iní-ndó càháⁿ ndìhì-ndo-dě cuendá ducaⁿ ñà túú ñă caní iní-dé cundecu ndìhì ñaha-dě xii-ndo, chi tnàhá-dé cúú-dě tée quìde chiuⁿ Xítóhó Jesucrìstú dătná quídè-í. ¹¹ Te cuìní-í sá nì ìⁿ-ndo vá cání cuèhé iní-ndó cuendá-dé, te chindee-ndo-dě nàcuáa cuu váha iní-dé òré quixi-dé quixi coto ñaha-dě xii-í, chi yúhú ndìhì dava-gá ñáyiú ndècu ichi Xítóhó Jesucrìstú ndétú-ndï-dě quexìo-dé.

¹² Te ío ní càháⁿ ndàhú-í núú tē Àpolós tée ndècu ndìhì-o ichi Xítóhó Jesucrìstú cuendá quixi-dé ndìhì dava-gá cue tée ndècu ndìhì-o ichi-gá quixi coto ñaha-güedě xii-ndo dico ñá túú ní cuìní-dé quixi-dé vitna, dico quixi-dé ndéé cuèé-gá.

Tnúhu ndéé núú ñă ndìhì-ná

13 Te ío quíhi iní-ndó cùndecu-ndo ichi Xítohó Jesucristú, te vá dáñá ndèé-ndó quìndáá iní-ndó-gã, te ío yíi cùnduu iní-ndó cùndecu-ndo ichi-gá, te ío nducunduè-ndo canchicúⁿ nihnu-ndo ìchi-gá. 14 Te ío váha cuu iní tnáhá-ndó, te ducaⁿ ío váha cada tnàha-ndo te núu nándi cùu sá vâha sàni iní-ndó càda-ndo.

15 Te nchòhó ñáyiú ndècu ndíhi-í ichi Xítohó Jesucristú sa nàha-ndo sá dñhnanuu cuè ñáyiú cùu ndí mee té Èstéfanás ndécú dìstrítú Acãyá ní sándáá iní-yu tnúhu Xítohó Jesucristú. Te vitna ñá túú dàña ndeé-yu quidè-yu sá vâha sá cúu-xí dàva-gá ñáyiú sándáá iní tnúhu-gá. 16 Te càháⁿ ndàhú-í núú-ndó sã quìndáá iní-ndó nchàa ñáyiú ducaⁿ xíquide, ndíhi nchaa dava-gá ñáyiú ío ndùcu ndee quide chiuⁿ ndíhi-ndo cuendá Xítohó Jesucristú. 17 Te ío cùdíí ìní-í sá ñí quexìo té Èstéfanás, ndíhi té Fortunátú, ndíhi té Acàicú, chi cue téé-áⁿ ñí quide-güedé núú-ndó ñí quide-güedé nchaa sá ñà túú ndàcu-ndo cada-ndo cuendá-í ní cùu. 18 Te ío tàxi-güedé tnúhu ndee ìní xii-í, te diu-ñi ducaⁿ tàxi-güedé tnúhu ndee ìní xii nchòhó tucu, te núu xíãⁿ xíní ñùhu-xi sá cánèhe-ndo sá yíñùhu núú nchàa cue téé duha xíquide váha.

19 Te nchaa ñáyiú xíndecu ichi Xítohó Jesucristú ndécú dìstrítú Àsiá quide ndee iní ñáhã-yu xii-ndo, te ío cada ndee ìní-ndó càchí té Àquilú ndíhi ñadìhí-dé tá Priscilá, te ducaⁿ quide ndee iní ñáhá tucu nchaa ñáyiú tàcá dácuàha tnúhu Yá Ndióxí vehé-yu xii nchaa nchòhó ñáyiú ndècu ichi-gá. 20 Te cada ndee ìní tucu-ndo càchí cue dava-gá ñáyiú ndècu ndíhi-o ichi Xítohó Jesucristú. Te ñi

yùhu ni iní-ndó càda ndee iní tnáhá-ndó ìⁿ ìⁿ-ndo.

²¹ Te vitna ndaha mee yùhú té Păblú téè-í tnúhu-a quìde ndee iní ñáhà-í xii-ndo.

²² Te ñáyiu ñá túú cùu váha iní-xi núú Xítóhó Jesucristú te na cuíta nihnú-yu. Te vitna nchaa-o chí ná càchí-ó sǎ Xítóhó Jesucristú quixi tucu-gá.

²³ Te xìcáⁿ táhù-í núú Xítóhó Jesucristú sá ná chìndee chitúu ñaha-gǎ xii-ndo. ²⁴ Te ío cùu iní ñáhà-í xii-ndo nàcuáa ndècu-o ichi Xítóhó Jesucristú, te ducaⁿ na cùnduu, te ío chí cádá ndèe iní-ñǎ vitna.

Tnúhu ní cáháⁿ yă ndiöxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

872f7754-0986-5ecd-a059-925a708a6939